

清

史

稿

清史稿

列傳

孝義

清興關外俗純樸愛親敬長內慙而外嚴既定鼎禮教益備定旌格循明舊親存奉侍竭其力親沒善居喪或廬於墓親遠行萬里行求或生還或以喪歸友于兄弟同居三五世以上號義門及諸義行皆禮旌親病刲股剝肝親喪以身殉皆以傷生有禁有司以事聞輒破格報可所以教民者若是其周其密也國史承前例撰次孝友傳亦頗及諸義行合之方志甄錄文家傳述無慮千百人采其尤者用沈約宋書例爲孝義傳事親存沒能盡禮或遷家庭之變能不失其正或遇寇難值水火能全其親若殉親而死或爲親復讐友于兄弟同居三五世以上及凡有義行者各以類聚事同以時次孝爲二卷友與義合一卷

朱用純

吳蕃昌

心從
結弟
讓
牧

周靖

耿燿

弟明兄子於并取舖

李景濂

汪涵

第 四 日

黃農

曹亨

黃盛家

鄭明允

劉宗洙

弟思廣 思廣子清鑑

何復漢

許季覺

吳氏四孝子

雷顯宗

趙清

榮漣

薛文

弟化國

曹孝童

丁履豫

鍾保

覺覺色爾岱

著 文社 什 布 務 良

王麟瑞

李盛山

李惻

奚緝營

周士晉

黃有則

王尙毅

胡鏐

李三

張夢維

樂太希

董盛祖

徐守仁

李鳳翔

卯觀成

葛大賓

呂敦孚

王子明

號星明

張元翰

俞鴻慶

姜瑤

湯淵

魏興

戴兆萃

潘周岱

張淮

張廷樞

胡其愛

方其疎明

張三愛

楊夢益

閻天會

夏士友

白長久

郭味兒

張家

董阿虎

張乞人

席慕孔

張長松

崔長生

榮孝子

無錫二孝子

啞孝子

朱用純字致一江南崑山人父集璜明季以諸生死難用純慕王哀攀柏之義自號曰柏廬棄諸生奉母其學確守程朱知行並進而程於至敬來學者授以小學近思錄仿白鹿洞規設講約從者皆興起居喪哀毀嘗曰宰我欲短喪吾黨皆以爲怪然可見古人喪禮之盡必蔬水饘粥哭泣哀毀無苟弛若今人飲酒食肉不改其常雖更三年豈謂久哉晚作輟講語又爲治家格言語平易而切至病將革設先人位拜於堂告無罪顧弟子曰學問在性命事業在忠孝乃卒用純與徐枋楊无咎稱吳中三高士皆明季死事之孤也

吳藩昌字仲木浙江海鹽人父麟徵明季死難藩昌事所後母查孝居喪水漿不入口旣殯啜粥不茹蔬果寢苦不脫衰絰比葬嘔血數升逾小祥遂卒從弟謙牧字哀仲爲程朱之學事母朱孝居喪杖不能起疾稍間手編父遺集復因治冠屨哀動行路謙牧體素羸益不自勝遂卒藩昌謙牧皆交于張履祥履祥稱之時以孝著者復有歸安沈嬰亦履祥友也竊事母嚴母不御酒肉竊力請

終不聽有疾醫爲言乃御酒肉磊客授于外弟子具時食不忍食以爲母未嘗也弟子乃先以饋母曰太君食矣乃食率以爲常

周靖江南吳縣人父茂蘭刺血上書明父順昌冤事具明史靖少補諸生事親能盡力茂蘭卒擗踊哭泣喪葬悉如禮三年不脫衰絰不飲酒食肉小祥有疾作或謂在禮得飲酒食肉靖不可靖素善作篆或請題榜亦以喪辭

耿燿河南太康人世農父應科好施與七世同居顏其堂曰效藝兄光明諸生孝後母而教諸弟嚴燿從之學事必諮而後行明末流寇屠太康燿與弟炳昇母避河北貿布以養母病朝出暮歸不解帶累月母卒挽車歸母喪炳亦純謹定興耿權與弟極以孝友聞炳墓其爲人分田舍處之孫奇逢爲作三耿傳焉方寇至光前卒未葬子於赫號泣守其柩不去寇執之推隕城下傷腰脅幾死寇退歸掬土掩柩乃去縣饑知縣餽以粟散贍貧乏督僮蔬任饑者刈以食同時有耿輔虞城人奉母避寇開封寇決河灌城倚浮木負母以渡母卒哀毀緇衣粗食終其世

李景濂字亦周浙江鄞縣人幼喪母父再娶于何而卒何年少媒氏欲奪之景濂聞同於道出椎擊之歸告何何相與慟哭誓相依終身何教景濂嚴景濂事何甚謹何嗜酪景濂日入市求之端捧急趨如鳥張翼市人怪而求其故則皆歎其孝爲讓道何老病景濂侍疾七年不忘何卒景濂亦六十廬墓三年作孺子泣景濂明諸生明亡棄諸生去爲醫

汪瀨江南休甯人晨日昴日昇其弟也父病咯血瀨年十六割股和醫進良愈後數年病足晨割股煉爲末敷治亦愈又數年復咯血晨復割臂以療更數年疾大作瀨復割臂勿膠晨病日昴泣曰吾兄割臂愈父吾不能割以愈吾兄乎衆尼之憐且仆匠治棺日昇持匠斧斷指血淋漓調藥以飲晨有司表其門曰一門四孝友錢塘吳瑗及弟琦璠琰相友愛年皆逾九十江蘇華亭美應龍應龍子世璜世璜子文樞子超萃超萃子懷權懷權子斌六世皆以孝行旌人尤以爲難

黃農江南元和人父衰諸生農年十餘母吳病六年農侍疾不懈母卒慟屢絕

坐臥母柩側哀客授于外携農俱久之察其枕漬淚若膏貌瞿然如初喪哀客授稍遠家農歸五日一往省哀止之則私伺門外問安否衣服器用時其寒暑具以往一夕心悸走省哀得暴疾昇以歸會除夕禱神願減算益父哀愈農三十餘而卒妻金亦賢孝

曹亨陝西鎮安人年十一喪母不能具棺號泣於路乞自鬻爲歛或與之金葬母畢卽詣其家執役終身黃嘉章湖南桂陽人吳三桂之亂從父避兵連珠崖父沒兄嘉林年十六嘉章亦年十一自鬻以葬父嘉林稍長力爲傭得錢贖嘉章還兄弟相友愛

鄭明允江南歙縣人康熙間耿精忠兵至明允侍母抱譜牒及先世遺筆入山賊大索山中明允夜負母匿僻塢還挈二子未至霧溢山虎聲震林木納二子石穴中疾趨侍母賊退二子亦無恙兄病視湯藥不去側及亡每慟輒絕與其戚同賈失其資明允發橐金盡與之族子緝客舍明允爲坐守達曙白于官出私財以歛有友蕩其資困甚明允罄所有以之無難色明允世業醫精而不試

曰十得九猶有一誤業賈終其身

劉宗洙字長源弟恩廣字錫三湖北襄城人父漢臣明季從軍襄城破被數創幾殆恩廣兩耳斷號泣負以歸宗洙方走避寇聞父難往赴賊殺其耳鼻居數年父病嘗糞時稱襄城嘗糞孝子父歿與季弟宗泗同居俄與恩廣皆得官以母老不出母歿恩廣嘔血至篤疾或慰解曰勿復言五內裂矣遂卒宗洙積哀兼痛弟亦嘔血卒恩廣子青藜康熙四十五年進士選庶吉士遭父喪哀毀嘔血事母不復出

何復漢江西廣昌人十五而喪父哭淚皆血長事母孝母疾作嘗糞苦甘以測病深淺不解帶者數月母歿寢苦三月淚漬苦左右盡血痕葬乃廬墓側日夜悲號喪終猶廬居耿精忠兵至復漢守墓不去親知毀其廬乃哭而行著古今粹言示子孫子人龍康熙五十二年進士入翰林

許季覺浙江海寧人少尚俠旣折節讀書居親喪水漿不入口者七日杖而後起含殮殯葬虞祔卒哭祥禫皆用古禮葬躬負土廬于側朝夕哭不輟季覺故

與同縣查氏交密查氏貴營葬侵許氏墓地季覺曰吾不能以友賣親訟連年不決親朋居間季覺終不讓查氏誣季覺通海逮獄有爲辨者獄稍解避地山陰查氏復誣以他事再逮獄季覺度不免獄中碎瓷盡吞之死

吳氏四孝子江南崇明人失其名父壯年家貧鬻子爲富家奴及長皆能自贖娶婦列肆居養父母兄弟議奉父母膳月而易諸婦曰翁姑老矣月而易必三月後方爲翁姑具膳太疏復議日而易諸婦又曰翁姑老矣日而易必三日後方爲翁姑具膳仍太疏乃議伯具早餐仲午叔脯次日季具早餐周而復始越五日諸子合具饌奉父母子孫皆侍諸婦以次上酒食以爲常室置厨兄弟各具錢五十父食畢取錢入市嬉易果餌歸畀諸孫錢將盡復具父或從博徒戲兄弟潛以錢畀博徒令陽負與其父以爲歡行之數十年父母皆將百歲奉事不衰陸隴其爲之傳

雷顯宗河南陳州人諸生父病瘵顯宗摩掌熱拊父四支二十七晝夜不倦父良愈居數年復病劇侍湯藥兩月餘竟卒哀毀柴立居母喪亦如之康熙中歲

饑出米粟濟貧乏代償其逋賦有鬻其孥者贖以歸休婚葬者三百餘家顯宗年九十朔望集家人講孝經曲禮內則諸篇里閭稱其家範

趙清山東諸城人生有至性嗜酒與同縣李澄中劉翼明輩徧陟縣中山縱飲輒沈頓喪父廬墓側百日母往携以歸喪母復廬墓側麻衣躬舂鍤負土爲墳毀幾殆客有勸者清曰清所以爲此者蓋下愚居喪法耳清狂蕩如湍水不居墓側將食旨久而甘聞樂久而樂居處且久而安不一期沈湎不可問矣不孝孰甚居廬久或傳有狼與犬爲守廬狎不相齧也

榮漣江南無錫人少孤多病母令爲道士善詩畫事母孝出游得珍玩良藥必以奉母游倦歸晨昏侍母側母卒廬墓不復出漣與縣人杜詔及僧妙復號三逸

薛文江南和州人弟化禮貧有母兄弟一出爲傭一留侍母迭相代留者在母側絮絮與母語不使孤坐日盱傭者還挾酒米魚肉治食奉母兄弟舞躍歌謳以侑寒負母曝戶外兄弟前後爲侏儒作態博母笑母篤老病且死治殯葬畢

毀不能出戶傭主跡至家父與化禮骨立不能起哭益哀數日皆死時康熙四十二年也知州何偉表其閭偉勤于民卒民祠焉乾隆間學政朱筠令以文化禮祔偉祠

曹孝童江南無錫人居南郭父爲圻者童五歲父或扃戶出則竟日不食鄰或哺之泣不食俟父歸同食父死童嗚咽旬死父側鄰市棺爲歛
丁履豫江南婁縣人少孤事母孝兄二弟一皆出游以歲所入畀履豫使營甘旨母卒將歛書師貌母像絕肖履豫諦視久之大慟仆地遽絕

鍾保滿洲鑲黃旗人父希晉以步軍校從討吳三桂積功當遷鍾保以父老力勸請休奉養康熙間自刑部筆帖式累遷刑部郎中居父喪哀慟水漿不入口事母尤謹歸必侍母側兄蕩產撫其孤祖遺田宅悉推與之弟貧周之甚力雍正二年舉孝子賜金旌其門官至工部侍郎

覺羅色爾岱滿洲鑲紅旗人德世庫七世孫也性篤孝年十七父病醫不効乃割左臂爲糜以進病稍間旋物事母益謹母病飲食減亦減飲食飲食不能進

憂之亦悵飲食母能飲食乃復常雍正元年命舉忠孝節義以色爾岱應詔賜白金旌其門授銀庫主事勤其官遷郎中康熙間以割臂療親旌者有翁杜佟良與色爾岱同時有克什布翁杜滿洲鑲白旗人佟良蒙古鑲黃旗人官防禦克什布滿洲鑲紅旗人官三等侍衛

王麟瑞福建南靖人諸生八歲喪母事後母如所生母病渴非時思食梅麟瑞繞樹呼號不食三日梅夜華結實奉母母良愈父喪廬墓三年遇虎虎爲卻避雍正初詔舉孝廉方正縣以麟瑞上四年授陝西道監察御史出爲直隸永平知府

李盛山福建羅源人母病割肝以救傷重卒巡撫常寶疏請旌下禮部禮部議輕生愚孝無旌表之例雍正六年三月壬子世宗諭曰朕惟世祖聖祖臨御萬方立教明倫與人爲善而於例慎予旌表者誠天地好生之盛心聖人覺世之至道視人命爲至重不可以愚昧誤戕念孝道爲至弘不可以毀傷爲正但有司未嘗以聖賢經常之道與國家愛養之心明白宣示是以愚夫愚婦救親而

捐軀殉夫而殞命往往有之既有其事若不予以旌表無以彰其苦志故數十年來雖未定例仍許奏聞且有邀恩於常格之外者聖祖哀矜下民之盛心如是其周詳而委曲也父母愛子無所不至若因己病而致其子割肝封股以充飲饌和湯藥縱其子無恙父母未有不驚憂惻怛慘惕而不安者況因此而傷生豈父母所忍聞乎父母有疾固人子盡心竭力之時儻能至誠純孝必且感天地動鬼神不必以驚世駭俗之爲著奇于日用倫常之外婦人從一之義而不改乃天下之正道然烈婦難節婦尤難夫亡之後婦職之當盡者更多上有翁姑則當代爲奉養他如修治蘋繁經理家業其事難以悉數安得以一死畢其責乎朕今特頒訓諭有司廣爲宣示俾知孝子節婦自有常經倫常之地皆合中庸以母負國家教養矜全之德倘訓諭之後仍有不愛軀命蹈於危亡者朕亦不概加旌表以成激烈輕生之習也盛山仍予旌表

李惻河南開封府人失其縣貧爲木工父病痺奉侍惟謹歲歉不能養乃行乞於市歸啖父後得賑穀一石慮不能繼日舂升許供父而以糶稅自咽父病劇

夜中鄰人時聞惻撫摩嗟泣聲遲明則惻抱父足死矣父亦一慟而絕鄰人愍其孝收而葬之

奚紺營字聖鄆江蘇寶山人父士本以孝旌紺營幼讀論語至父母之年不可不知輒隕涕簌簌帥奇之謂眞孝子也母病刲臂以療士本老惡寒紺營夜抱父足眠以爲常兩弟早卒撫其孤如所生女兒嫁而貧從妹寡皆依以居爲營婚嫁

周士晉江蘇嘉定人母病久醫言惟飲人乳可生士晉子生方九月謀於妻李棄道旁以乳乳母母病已間兒以殤對後李不復妊亦無恐越十二年有僧爲殷氏子推命年月日與士晉兒同詰之則得諸道旁者也父子得復合

黃有則湖南邵陽人四歲喪父母係劬苦育以長遣就傅或迂之孫曰吾忍死不欲兒廢學也有則大感慟奮學客授養母夏無帳主人以進命撤之曰吾母無此也寒爲製棉衣又邵之曰家貧無以煖母不忍享奇溫一夕風雪旣寢復起行三十里歸省母母喜曰吾正思兒是時母逾九十有則亦六十矣母喪以

毀卒

王尙毅陝西邵陽人爲人傭母佞佛欲鑿山造佛象力不逮將死以命尙毅尙毅備衾衣食積錢買山闢洞琢石爲佛像洞六象十二皆手造或慙而助之謝曰力不己出非敬母命也錢盡乃輟復出傭得錢更爲之如是三十餘年山植柏圍以紫荆洞上下時迎春洞成方冬花盡開山人怪之名曰九華洞山無水鑿池而雨至遂不涸名曰青龍池

胡鈺浙江上虞人銕九歲從母汲母墮井銕呼救未至亦躍入井救至引以出俱不死中歲遊陝西一夕忽心痛曰殆吾父病耶馳還父正病旋卒哀慟盡禮方冬母病求醫途遇盜衣盡褫冒寒行數十里與醫俱歸

李三江蘇宜興人一目眇一足跛父死二兄皆娶析產有田六畝屋四椽舟一二兄分田屋而畀三以舟送養母三奉母食必有肉母至二兄所三輒私致甘旨二兄死嫂一前死一嫁三獨奉母晨爨畢乃以舟應客或當出五十里外度盡日不能返雖重雇不之許事母三十年鄰里稱其孝撫兄子慈而教之嚴母

將死呼孫執手泣曰兒學好毋累汝叔怒自是不復怒其兄子

張夢維直隸元城人縣諸生父晚病風痺夢維日侍左右臥起飲食溲溺皆躬自扶持父憇其勞呵之去少退復前數年不少懈事母如事父居喪哀毀準家禮屏俗習弟病疽爲剪髮灼艾日數省視及卒慟甚幾喪明弟妻或詬詈待之有加撫孤女逾已出弟妻卒悟且悔少師郡人衛鶴鳴治程朱之學鶴鳴卒心喪三年授弟子孝經小學以力行爲本

樂太希湖北通山縣人幼慧三歲母負以嬉墮地傷額祖母問詭對恐祖母見憐而怒母也父疾抑搔澣濯晝夜不去側居喪盡哀旣葬恒繞墓悲痛母疾及喪亦如之廬墓側居五年早爲諸生以事親不應試或延使授經輒辭慮違親也親旣終益篤學

董盛祖雲南黑鹽井人盛祖不知書早失父事母謹起居飲食侍視不少懈一妹嫁里中盛祖出負販呼妹還侍母妹亦善事母如盛祖盛祖行遇蛇當道驚曰母得無病乎歸則母方病呼盛祖人皆怪之母喪哭甚哀或慟絕鄰里驚救

之乃甦盛祖有妻早亡不更娶或勸之曰娶婦以事親顧賢者實難脫不賢將戾吾母吾能安乎卒不娶未終喪遂卒

徐守仁安徽青陽人世爲農未嘗讀書四歲而孤事母孝得備直市酒肉奉母母呼共食輒以持齋謝實不忍分甘也母沒哀慟旣葬露處墓側蛇虺不避里人哀之爲廬舍飲食焉守仁并奉其父木主以居四年乃還其室鬚髮皆白

李鳳翔直隸武強人善事父母鳳翔以父老自請佐家事而督諸弟讀書習射應文武試父將終遺命析產心憐幼子而未有言鳳翔察父意益以所分三之一父歿事母益謹道光初漕沱連歲氾溢閭里蕩析負鳳翔債者二千餘緒悉焚其券復散錢濟貧者又遇旱所藝蔬果任饑者采食族子早孤他縣人以迎喪遇盜皆厚周之或將屠馬鳳翔贖以歸馬馴異常畜鄉人感之遂無屠馬者卯觀成雲南恩安人父漢而母夷烏蒙亂父死母被掠鬻爲婢亂定觀成無所依爲陷通禁卒父母嘗爲聘婦舅促觀成娶娶而不與婚三年舅詰之曰吾非不欲婚也行將嫁吾未婚之妻取所直歸吾母與之婚情不能割義亦不可出

也語且泣有義之者募得六十金以半贖其母半爲營廬舍成婚仍爲禁卒以養母

葛大賓字興森湖南湘鄉人諸生四歲喪父哀慟如成人喪終值忌日出主祭主仆粉落葛字脫露周姓蓋木工飾周氏廢主爲之大賓痛哭引咎告墓易主事母鉅細必躬疾營藥生徒有餽則獻嘗出客授獨坐心動亟還呼母母出屋後山遽頽壓母坐處母沒飲不入口者五日旣葬不脫衰腰以下縷皆盡喪終祭必哀兄弟旣分居財盡大賓復與同居通財無所私沒則庀其喪無子爲立後

呂敷字湖南永定人父孟卿貧以客授自給母病將殆思肉食敷孚方七歲貸諸屠屠不可泣而歸聞母呻吟益痛內念股肉可啗母取廚刀礪使利割右股四寸許授其女弟方五歲令就爐火炙以進母疾良已孟卿歸察敷孚足微跛得其狀與母持以哭敷孚曰母然兒固無所苦也鄉人皆嗟異稱孝童長爲諸生學政溫忠翰疏聞尋除華容訓導孟卿亦嘗刲股愈父病然敷孚割股時初

知父有是事也

王子明甘肅通渭人諸生事母孝出爲客蔬果新出必遙獻乃食嘗赴試母病桃香久不散女曰此必吾兄所獻記其日歸驗之果然馮星明甘肅秦安人爲營卒戍龍山食新韭置諸案叩首同伍問之曰以獻母咸以爲迂或歸候其母母曰他日吾假寐夢兒以韭食我覺猶有餘香叩其日星明獻韭時也

張元翰直隸南皮人光緒五年舉人除獲鹿教諭遷知縣方謁京師父嗣陶時爲萬全教諭卒官元翰奔赴慟哭幾不能勝居喪三年悉用古禮喪終以知縣待闕河南奉母赴官掘澠池甯陵諸縣方有事于考城而母遽卒元翰以父母卒皆不克視終事大痛將歸葬自爲文祭告憑棺一慟而絕

俞鴻慶湖南善化人光緒十八年進士改庶吉士授編修事父母篤孝官京師歲必乞假歸省二十七年母劬鴻慶方自西安還京師聞喪奔還哀慟若不欲生父年已八十衰病鴻慶跣步不去側婉容愉色依慕如少時冬夜必數起省視或竟夕不眠二十九年父劬鴻慶慟甚以毀卒距父劬方匝月

姜瑤雲南嶠峨人父文柄嘗遠游瑤裹糴行求得以歸貧析薪治圃以養父嗜飲日必具酒家益貧父爲罷飲命子跪而請翌日偕樵於山買酒歸共勸酣飲日以爲常父歿輒提父觥飲壺沽酒哭於墓人稱其圖爲孝子圖

湯淵江蘇常熟人八歲喪父母茅紡織不稍休淵見輒淚下少長爲負販勸母暫休母曰休不且餓死耶淵大慟客至母擎茗碗呼淵持以出淵跪而受自責貧不能具僕婢也娶生子而婦亡或勸再娶曰吾已有子何忍分養母力以養婦竟以繆終母卒哀號動行路其後家稍裕方冬有被而無褥曰吾母昔無此也將卒命市棺視殯母之費

魏興直隸新城人早喪父興與弟繼宗皆入伍繼宗戰死興以母老入伍爲樵以養歲饑米貴興以米奉母而自食糟糠位不飽興亦老樵不足毀屋伐屋後樹以爲安康諸生張鵬翼聞其事過興見興侍母左右扶持如童子因問其隣魏叟與其母曰何食隣曰興噉包穀母食麥鵬翼大嗟異以其事白知府月予以粟興母子始得飽

戴兆笨安徽旌德人少從父業縫紉十三喪母盡禮事後母如母父病啜亦減飲食百方療父不得則割股糜以進終不怠慟甚廬墓側朝夕稽顙時歸省後母呼妻出戒以善侍養不入其室

潘周岱安徽涇縣人爲竹工與父同傭必躬其勞而遺父易且逸者父創足負以往返老廢周岱獨應傭得酒肉時蔬懷歸燂以進家食必父母食乃食歲饑奉父母必豐次以食弟躬與妻子飽糠粃父母疾左右侍養無須臾去側母家山下泉冽母病篤夜半思得泉以飲周岱挈瓶往行四十餘里嚮晨以泉至居喪旦暮悲號先後廬墓三年喪既終夕必詣墓蒸香然燈如是終其身妻吳亦孝無違命

張淮浙江秀水人貧粗識字爲人收田租父有心疾思食羊非特殺則不食淮買羊殺以食父思出游則賃肩輿侍以出窮日乃還父疾數年凡所思百方致之不稍怠疾篤割股進卒不治同時張廷樞爲衣工奉母常效市中兒嬉戲以娛母一日鄰家火負母出遷祀先之具而不及他器用節所入爲弟娶婦而終

身不自娶縣人與淮稱二孝子道光初年事也

胡其愛江南桐城人爲人傭而養母母病罷癱其愛日夕在左右視臥起飲食出就傭具晨餐度午不得歸出勺米付隣媼屬代爨必拜隣媼止之行數里外復遙拜夜必歸爲母滌中裙則臉在傭家得肉食卽請歸遺母母出觀優負以往夜則負以還欲往戚黨家亦如之母沒負土爲墳居悒悒而卒方其明亦桐城人亦爲傭而養母母亦病罷癱其明慮出傭母飢渴乃棄傭爲丐負母以出得食必先母母卒乃爲圖時荷鋤而泣曰昔爲乞苦飢寒不離母側今稍足衣食思母不可得矣鄧成珠福建秦寧人亦爲傭而養母傭所距家遠日乞米一合昧旦送母所還執傭母盲不能炊乃負母依主家傍舍朝夕爲具食主或以爲言成珠曰成珠自減餐奉母不敢重累主人也居五年母卒葬畢辭主人不知所之

張三愛江南歙縣人爲人役事母孝母病不能具藥物或謂之曰汝欲愈母病盍剗肝三愛禱於叢祠破腹肝墮出以右手剗肝得指許左手納於腹束以白

麻歸以肝和羹飲母母良愈三愛創亦合三愛所事主故嘗爲知縣貧通賦三愛輒代承被答不少懟主病且死命三愛去三愛勿聽事主之子如事主

楊夢益陝西郃陽人賣菜傭也事母孝妻賈力紡織以佐養乾隆中歲飢夢益與妻食糠粃盛米於甕置其中熟以奉母米盡將鬻子族人感而周之乃止閭天倫甘肅隴西人貧父居僧寺天倫與妻楊鵲鳴起磨麪及明入市求父所嗜往饋午若哺皆然夜則從父寢父失明天倫爲茹素年餘目復明天倫先父卒揚賣漿爲養如天倫在時翁卒力營葬忌日必祭終其身

夏士友湖北江夏人事母孝傭力以養不足則減己食食母鄰或邀食必先爲母具食然後往寒語母勿早起自執炊置食牀前又丁甯屬母善自護乃出如是以爲常年四十未娶或愍之助其娶婦居牛轅士友自外歸婦與姑詬于室流涕責婦卽日出之或曰出婦如無後何士友曰有婦欲其孝有子孫亦欲其孝苟不孝安用婦安用子孫年餘士友疾卒母哭之慟隣有張某感士友孝而不得終事母月供薪米終其身

白長久甘肅平番人幼孤貧負販奉母具甘旨母或不怡以首抵母引手披其頸俟解乃止里社演劇負母往觀侍側說劇中事母年八十長久亦六十未嘗稍懈光緒中青海辦事大臣豫帥餽以金不受母卒朝夕詣墓饋食三年

郭味兒甘肅禮縣人賣漿出必拜母歸亦然母嚴稍不當意卽悲味兒爲孺子狀悅母母苦脛痛或言痊枯骨母當愈黎明輒攜長幾徘徊邱隴間寒暑不間母卒飲不入口五日毀卒姑宏陝西鄂縣人賣酒事親孝得錢易甘脆奉親母卒臥父榻側時省視畜犬得餅銜飼母人以爲孝感

董阿虎江南山陽人少父喪爲人擔水得值養母稍有餘必具甘積十餘年構茅屋奉母一日鄰被火阿虎負母避還跪戶外乞神佑俄左右盡蕪獨阿虎茅屋存

張乞人順天永清人失其名父死行乞以養母穴土爲居天大雪知縣魏過其處聞歌聲出地中怪而呼問之曰今日母生日歌以勸餐耳繼齊命市其母子至縣繼齊母昇其母粟及布繼齊與銀十緡乞人叩頭曰官母賜我

不敢不受官賜我不敢受繼齊問其故不曰民愚不知此十結官何所受之我母年八十我年六十一爲清白百姓足矣繼齊不復強將爲營室乞人負其母去不知所終

席慕孔廣東三水人善養母嘗娶妻生子歲飢田數畝盡鬻妻怨其貧求去遂遣之夏秋助人耕穫爲傭冬則乞食以養得餅餌歸食母得餘羹啜清以肉歸張長松山東棲霞人母瞽長松出爲傭主人與之食輒不盡歸遺母無所事則乞諸隣里母食已乃食其餘冬大雪長松病不能出呼母涕泣言曰兒不肖不能養吾母乃乞食母賴以活今疾憊母老可若何遂死

崔長生江南邳州人生而瘡手又瞽爲傭養父母出入必面歲大禋乞食于市得糟糠上父母自食草根木實以活拾字紙得遺金待失者逾月不得乃易母餒餉之茁壯蕃息爲父母治送死之具喪父母昇葬於中野遂去不知所終榮孝子河南遂平人幼癡雙無名家本饒後中落貧甚父卒無所居奉母居棲流鋪出乞食擇所得供母自食其餘得少則但供母而自忍飢歸見母必叩頭

食必跪進母食則起而舞食減則泣母或故減食以食子則泣不受母七十餘卒縣人爲具歛朝暮泣終其身吏以孝子旌其棺亦不知孝爲何名也卒亦七十餘

無錫二孝子皆失其姓氏其一髻磨粉爲業事母至孝竭力供甘旨年至四十餘復明人皆異之其一啞行乞得錢以養母必具酒脯母卒食必祭祭必伏地號痛既葬哭于墓見者皆感

啞孝子無姓氏或曰雲南昆明人家有母老矣行乞以養得食必奉母母食然後食母或怒嬉戲拜且舞必母樂乃已得錢密投諸井母卒鄉人有欲齎錢以助歛者與如井數數指水中鄉人爲出錢營殮且葬事畢遠游不知所終

清史稿

列傳

孝義二

盧必陞

李應麒

李中德

張文齡

黎安理

易良德

方立禮

丁世忠

汪良緒

賈錫成

王長祚

黎興峴

夏汝英 金國遠

李志善

弟志湧 彭大士

錢孝則

任遇亨

族子 格德

陸國安

徐守質

兄基

黃簡

程顯學

郁褒

姚易修

胡夢秀



賀士林

字一剛

林長貴

字長廣

李敬躋

張士仁

劉希向

馮福基

李澄

趙萬全

李芳燦

繆士毅

字秉文

汪龍

方如廣

朱壽命

翁連槐

弟連輝

陳嘉謨

戚弢言

張大觀

字大慶

潘珣

沈嗣綬

字君澤

黃向堅

字廷瑞

劉獻煜

字廷瑞

劉龍光

唐肇虞

陸承祺

弟承祚

張巖

潘天成

楊士選

徐大中

沈仁榮

魏樹德

李汝恢

鄭立本

李學侗

董士元

李復新

黨國虎

嚴廷瓚

陸起鵬

虞爾忘

弟起鵬

弟爾雲

黃洪元

弟洪元 弟中和

王恩榮

楊獻恒

任騎馬

李巨勳

任四

王國林

藍忠

盧必陞字采臣浙江山陰人九歲父芳病思得蜚螭炙必陞挾筐求之沙上潮至幾死不釋筐明季遇寇芳獨行入山必陞行求得之歸必陞為叔父茂後順治初寇繫茂舟中必陞繞岸哭三晝夜不絕聲寇引使見茂脅茂降拔刃屢欲

下必陞叩頭流血乞貸死久之寇中有義其行者脫茂使共還茂有女忌必陞
嗾母遣必陞往松江使盜擊諸途盜察必陞且死曰爾死勿我讎誰某實使我
必陞陽死盜擲之水復以救免必陞書告所後母但自謝不謹被盜所後母爲
感悟爲母子如初

李應麒雲南昆明人遭亂與其父相失被略至迤東乞食歸喪母勸父再娶後
母至遇應麒虐應麒賣卜以養失後母意輒笞楚跪而受杖後乃被逐事父母
愈謹父生日賣卜得雞米持歸爲壽佃人田方耕聞後母病輟耕走三十里求
醫藥後母生三子友愛無間後母久乃悟卒善視焉

李中德漢軍旗人康熙初父從征福建中德亦出參陝西軍事奉母以行事畢
還京師父先福建還已娶妾生子矣中德母至父啗妾而出嫡拒不相見中德
爲請叩頭流血父終不聽請得居別室亦不聽乃營室東直門外奉母早晚待
父側無幾微憾善視諸庶弟越六年父病棘乃告父迎母還父深悔焉旋卒妾
亦死中德母撫妾生四子如己出中德亦友愛如父在時

張文齡字可庭河南西華人父嘏妾而憎其母文齡事父撫庶弟甚篤庶弟亦感之而父終不悟遂文齡文齡號泣呼天自慙艾謂不復比于人未嘗一言揚親過遠近慕其行遣子弟從游得束脩因庶弟以獻其父或不得通循牆走泣且望見者皆泣下雍正五年成進士父榮之意稍改八年就吏部選京師地震死者衆文齡亦與焉鄒一桂與爲友歸其喪父始悟其孝爲之慟

黎安理貴州遵義人祖母卒復娶而悍父不容於後母客授四川灌縣遂卒塋焉母還母家安理方十歲留祖父母所祖母遇之虐畫則令刈薪夜督舂舂重不舉繩絡確以足挽之恒不使得飽嘗取毒蠱納其口誘之溪側推墮水皆瀕死遇救蘇旣長習舉子業出客授佐家祖父卒爲治喪葬祖母病侍疾不倦卒又爲治喪葬無闕禮其事祖父母凡三十有四年痛父客死恒詣灌縣謁墓母復歸事之孝兩弟不勝祖母虐出走安理往來黔蜀求得仲弟還季弟客死撫其孤安理晚舉乾隆四十四年鄉試授永清教諭遼山東長山知縣有治績告歸卒於家

易良德湖南黔陽人出爲世父志宰後志宰性急屢撫兄弟子皆不相能遣還本支最後得良德良德能先意承志得其歡心有疾晝夜侍寢食俱廢里人無子者恆舉良德相慰藉

方立禮江蘇江都人母歿後母遇之虐怒輒與大杖立禮謹受無慙一日杖幾絕及蘇無變容父歿遂立禮立禮時時候門外問起居疾則憂懼不食愈乃已妻洪亦孝謹日受鞭撻後母稍自悔爲少戢後母歿爲之哀毀後母二子皆早死立禮育其子女如己出

丁世忠湖南黔陽人母初未有子父娶妾母生世忠妾亦有子女而悍惡世忠嘗飲之不死父懦令別室居世忠事兩母無慙庶弟無禮于世忠嫡母喪不欲持服世忠皆不與校庶弟坐事破家世忠亦中落仍割田畀之

汪良緒江蘇吳江人父嗜博母諫忤父爲父逐良緒日夜號泣求返其母父怒併逐之乃奉母依其妻父居父以博破家亦來與共居母出奩資易田盡爲父所鬻良緒客授以養方暑父撤牀上帳憤博進屢易屢罵良緒亦不具帳晨起

幾跡徧其體母多病良緒必親視湯藥出客授母疾病方冬水凍舟阻履冰而還母既歿哭泣無常寢不解絰稍寐輒呼阿母寤則大慟未終喪而卒卒後視其枕麻布包土也

賈錫成江蘇宜興人父映乾性嚴錫成生而母吳以小過逢映乾怒遂去不返錫成稍長鄰兒嘲無母問得其故悲不勝甫成童屢出訪母過無錫夢至尼菴嫗子食甚慈愛因徧訪諸尼庵方雪老尼問里居曰宜興因曰吾徒亦宜興人見之卽其母也相持哭母終不肯歸錫成數省視饋食及母卒以喪還葬上冢哭必慟映乾遭疫卒錫成痛甚伏柩側喃喃若共父語夢中或歡笑寤則大慟疾作遽卒距映乾卒纔五日

王長祚字爾昌湖南衡陽人父喬年以富名明季張獻忠破衡陽喬年出避游騎繫長祚與次子璠求喬年所在榜掠終不言寇挽長祚髮加刃於頸璠號泣求代寇中有騎者言此父子皆孝奈何殺之遂得釋劉國寶芷江人國初流寇入縣境國寶負母出避道遇寇刦母衣刃創國寶血流至足國寶忍痛跪乞還

母衣語迫至寇懲其孝而還之康熙中吳三桂兵至掠族弟國賓其母嫠也哭之喪明國賓行求國賓踰年以歸其母目復明貧不能自存國賓分田百畝與之曹超安徽和州人順治中鄭成功兵至超奉父母出避遇寇欲殺之超號泣求代並得免居喪負土爲墳家有紫薇父手植也久枯每對之哀慟非時復發花

黎興所湖南湘陰人張獻忠破長沙略湘陰興所父嘉品爲賊繫將殺之興所八歲請代父死賊幼之舉刀令申頸泣曰此恐欺我旣殺我復殺父乞但殺我一人引頸就刀賊兩釋之里人稱之曰孺孝夏汝英湖南安化人順治初遊兵掠其家汝英九歲衛母不去左右游兵掠汝英去道中告以母孤苦乞釋還賊憐而許之金國選湖南黔陽人吳三桂之亂賊掠其父母去國選七歲牽衣痛哭求釋不得罵賊賊嚇以白刃不舍擊以杖終不舍乃釋其父母張懷湖南湘陰人年十歲寇至從其祖走避寇執其祖將殺之懷哀號求代身蔽祖被數創不顧寇嗟歎捨之去

李志善志勃湖南安化人父步武諸生流寇破縣縛步武志善十六志勃十四號泣求免賊詰步武里中孰爲富步武罵賊賊殺之志善志勃奪賊刀殺賊皆爲賊所殺彭大士湖南湘陰人順治初李自成餘黨破縣執大士母求金大士給賊金在井側請偕往因赴井母走免大士年十八妻仇歸大士僅二十日亦入井死

錢孝則江南桐城人方明福王時父以黨人被急逮變姓名挈家人亡命至震澤兵起母及弟妹皆赴水死孝則與父匿稻田中得脫兵過收葬母及弟妹走福建未幾福建亂作父子奔避相失孝則走廣東數年還福建求父十三年始得與父俱歸父續娶于徐徐有富名父他往盜夜至毀闢縛孝則迫令導入徐室孝則不可盜所以斧顱裂死

任遇亨江南崑山人生有膂力國初盜大起遇亨負父逃盜劫其父去遇亨持刀突入負父出身被數創腸出遇豁得不死扶父徙居嘉定以老族子裕德有土豪積怨於其父伺隙持刀欲殺之裕德年十一身蔽父兩手奪刀正言曉以

禍福土豪擲刀去父病痢三年裕德晝夜扶持躬滌濯污穢父卒居喪哀毀友于兄幼卽請代兄杖兄老而無藉養生送死皆任之甚具

陸國安浙江山陰人父華字順治初縣境寇作縛華字入砮求金以贖國安歸自海上奮入寇砮賊寇救華字歸被重創卒無恙

徐守質江南常熟人順治初守質與兄基奉母避亂母老病兵至度不能去守質謂基曰母徒死絕徐氏後兄速行守質當奉母基不可兵迫守質慍促基行守質有妹適袁氏早寡攜子與母俱基乃棄妻子挾孤甥而遁事定基還母與袁氏妹俱自沈井守質被二創仆死

黃簡字敬之湖南祁陽人父川忠諸生簡事親孝順治十年二月李定國兵略湖南其將郝永忠屠祁陽簡奉父母避兵竹山母渴命簡取飲兵遽至簡父竄山陽簡妻張奉姑竄山陰簡取飲至不見父母升高望之見亂兵縛一人置釜上將烹則其父也簡大呼往乞代亂兵釋簡父執簡求賂不得遂烹之村民哀簡名其山湯鑊嶺

程願學字奐若江南儀真人順治十六年鄭成功兵退縣人坐連染死者二十餘願學祖故睢州知州紹儒與爲父免死徙塞外願學以幼留稍長將出塞求父慮死且無後乃娶妻生子妻死挾子行道中子病還計行待子長居恒喪服食但啜粥不飯不食果蔬衣不帛不棉櫛居學舍旁授經不出戶訓導願學慕其賢屢過皆不見偕其弟子出不意往語願學何自苦願學對曰願學有隱痛不可以爲人非以自苦也明日報謁贊硯與書囑謝曰子無所受於人今吾受子遺亦願以報子願學乃持硯與畫去他日復過之已他徙矣俄卒露求得其硯銘曰廉士硯

郁裒字子弁浙江嘉善人父之章順治六年進士以大理寺丞坐罪徙尙陽堡京師修治官廨許罪人出家財佐工贖罪裒請任刑部官廨之章得贖還工未如程例當復徙裒叩閣請棄官代行裒弟諸生廣叩閣言身當代父徙留裒侍父疾部議代子父徙非舊例仍用衝突儀仗例治罪聖祖愍其孝友並宥之之章還鄉里裒以貢生授江西永豐知縣

姚易修字象亭江南元和人父宗甲康熙初客閩浙總督范承謨慕耿精忠爲亂執承謨盡繫其幕客宗甲與焉易修聞詣精忠齎指作血書願代父死賊乃釋宗甲而繫易修獄督使降易修不爲屈康熙十五年師至乃得脫歸易修母聞變悲泣兩目盲易修晨起舐母目母目復明鄰家火易修突火入負父出又入負母出髮盡燎兩足焦爛而父母俱無恙

胡夢豸江南江都人康熙中從父至紹興省墓道遇盜刦民財斥其不義盜怒將刃之夢豸從後至奔赴擊盜扑民羣起毆殺盜盜大至欲屠其里夢豸曰不可以我故危一鄉也入盜寨獨承殺盜遂被殺

賀上林江蘇丹陽人父天叙以事忤知縣繫獄將殺之上林年十八謀脫父聞巡撫將上官涉江溯淮迎舟呼嚙從呵之不得前乃發憤投水髮沒數寸復躍起大呼巡撫見令救已死檢其衣得白父冤繫狀巡撫按部黜知縣釋天叙出獄鄉人爲立賀孝子祠何士閔安徽南陵人族人破其祖母冢以葬士閔訟不得直巡撫檄知縣詣勘族人持之力事未定士閔慟觸墓碑腦裂死知縣乃責

族人他葬治其罪葬士閼碑曰義士

陳嘉謨江蘇興化人順治初諸生父宏道爲恣家所誣繫揚州府獄獄卒絕其
漿餽嘉謨求見父不得知怨家計必殺之乃痛哭禱于神自沉於水明日鹽運
使得嘉謨訟冤血書而嘉謨僕又訴失嘉謨求其尸七日得于鈔關水次植立
風濤中髮上指遂出宏道獄葬嘉謨而抵誣告者罪

林長貴長廣福建福清人父宗正業曬鹽入城至星橋海潮暴至溺死長貴聞
之奔救不及仰天長號投橋下殉長廣繼至繞崖痛哭亦自沉時雍正九年七
月里人憫其孝收三尸歛焉

戚弢言字魏亭浙江德清人父麟祥官翰林院侍講學士坐事成甯古塔弢言
從備艱苦麟祥遣令歸就試成雍正八年進士除福建連江知縣勤其官乾隆
初赦流人麟祥不得與弢言深痛之總督郝玉麟將入覲弢言刺指血爲書求
赦父詣玉麟乞代上玉麟難之弢言叩首持玉麟裾號泣引佩刀欲自裁玉麟
乃許之詣京師以弢言書上高宗憫之赦麟祥麟祥就弢言養連江明年卒弢

言持喪還哀甚亦卒

李敬躋字翼茲雲南馬龍州人父盛唐雍正八年進士官四川松茂道以所部有罪坐監臨官戍卜魁卜魁距雲南萬四千里敬躋三往省嘗遇暴水喪其僕馬徒步行路人哀之與之食導使詣盛唐盛唐輒令還侍祖母迫使歸敬躋成乾隆二十二年進士授福建將樂知縣計贖盛唐還盛唐死戍所敬躋遂發病日鳴嗚而啼未幾亦死卜魁有范杰者與盛唐善盛唐倚以居二十年至是歸其喪閩人吳阿玉嘗欲從敬躋之官盛唐喪過京師吳爲送還雲南

張大觀河南偃師人乾隆二十六年秋伊洛水溢灌偃師民避水奎星樓上大觀奉母亦登焉水撼樓樓傾柱壓大觀手臂折奮入水求母望母髻露水中得之負出水攀樹以上泳而求食以食母水退負母歸其室卽夕創重死同時有楊璞與其弟奉母居水至弟以筏載其妻逃山上母呼不應璞棄妻子背襁母浮水至神隄灘或援之得登頃之有婦抱子從水下母遙望呼曰吾婦與孫也拯之皆不死而弟乘筏卽至山下樹折壓筏沈夫婦俱死又有蔡應泰居母喪

柩在堂水至以繩繫母柩跪而負之入水中疾駛亦至神隄灘村民以長釣引至岸昇以上日暮其妻子亦得救

張士仁江南崑山人六歲母有疾泣禱請代母良愈十三從父寢仇伏榻下露刃出士仁呼父未應手捍之指欲墮涕泣語仇請代仇爲感動呼其父醒曰爾有此子吾不忍殺爾父惶遽良久始定與矢天日釋怨母喪盡禮後母虐士仁士仁孝敬無稍渝後母亦感悟火作負父出復入火負後母後母抱幼子幾不勝風反得無恙居父及後母喪如喪母里或忤父母必泣勸之悔乃已

潘瑯浙江錢塘人父出近游家遇火母出篋令瑯負以行及門回視不見母委篋復入家人自火出止瑯母入瑯不可入與母俱死瑯女兄珠姑嫁范氏歸甯亦在火中家人欲掖以出珠姑揮之曰汝男子何可掖我我從我母死耳火熄瑯與母姊三尸相環結時乾隆四十四年十二月望瑯聘妻王家江干聞喪來歸事舅以孝聞

劉希向江南山陽人火其父入火中求先人木主遺象希向自外歸突火入求

其父不得號而出復入火方盛救者以爲劉氏父子死矣俄而牆圯顧見庭樹下人影往來乃爭入負其父出左奉象右握木主希向牽父衣額半焦矣後數年父病希向爲割股良愈希向年六十病時其子亦割股刀鈍肉不決剪之乃下然希向竟不瘳

沈嗣綬字森甫江陰人父燭遡湖北通判咸豐二年死於寇嗣綬奉母還寇至徙避江船高不可攀展襦被以其母登至通州轉徙山東河南結繩牀舁母步從之千數百里不去左右未至蘭山道遇寇嗣綬涕泣乞免寇感其孝遣四騎護行至蘭山方閉城拒寇嗣綬求入城守者疑謀也趣縛之涕泣言其故乃得釋旣亦得官湖北以母病不赴侍養十六年進湯藥夜起慮履聲驚母雖嚴寒必跣凡事婉曲稱母意見者感歎謝君澤江蘇武進人父祐曾事母以孝聞寇亂爲賊虜君澤冒死依護父齒豁不能食恒嚼以哺賊欲戕之則號泣乞代父死賊首感動並釋之

馮福基代州人父煒爲安徽潛山天堂巡檢咸豐七年寇至福基年十四匿母

他所藏利刃計伺隙殺賊不可得日夜涕泣從至黃梅市毒藥置飯中斃賊十七亦吞藥死巡撫李紱宜奏言福基以童穉之年護母陷賊計殺凶黨多人從容就義奇節至性深可嘉愍被旨旌卹

黃向堅字端木江南吳縣人父孔昭崇禎間官雲南大姚知縣挈孥之官向堅獨留鼎革後孔昭阻兵不得歸向堅日夜哭將入雲南親朋妻子頗危之向堅決行至白鹽井得父母並弟向嚴皆無恙留一年乃歸時爲順治十年行二萬五千里有奇向堅次山川道途所經自爲圖十二記之吳人作樂府紀其事顧廷琦江南長洲人父繩詒崇禎間官四川仁壽知縣死張獻忠之難事定廷琦徒步入四川閱四年乃至成都轉輾求得繩詒墓龍腦橋側持喪歸自撰入蜀記述其事

李澄字仲瀾雲南昆陽人明季充選拔貢生父兆旂官廬江訓導死寇難幼子潛從死澄奔赴收父骨返葬請于當事得立祠晨必詣祠拜且泣寇至奉母洪避山谷洪病亟言不願以山谷終負母投佛寺遽卒負遺骸擯祖墓順治初山

獐入州城劫官舍發藏粟省吏以兵至執澄將殺之兵中有誠澄者乃免澄因言山獐迫饑寒無與百姓事今固不宜累百姓卽山獐亦不宜輕言勦否則且反戈乃坐其渠州民以安兄弟凡八與仲弟俱老相友愛

劉獻煜字台凝陝西華陰人父濯翼明崇禎間官武昌母與偕遭亂絕消息順治初獻煜徒步求父母亂初定道阻屢瀕險乃達哭山徑中遇叟識濯翼殞所發得軀朱書姓名里貫皆具猶濯翼所自記也乃負骨歸葬錢美恭浙江山陰人父士驕明官雲南陽宗知縣與妾之官美恭留侍母康熙元年美恭得請于母求父至雲南乃知士驕遷嵩明知州卒葬通海美恭至通海得故僕導詣士驕墓得庶母及幼弟貧無貲留五年乃負骨歸葬

趙萬全浙江會稽人父應麟明季客授北游萬全始二歲既長問母父安在母告以故年十九出求父應麟初客京師遇亂轉徙死馬邑萬全徧訪江淮間亦至京師心疑應麟死見道有遺骸刺血滲之不得入則號於路又自京師西亦至馬邑馬邑人張文義嘗招應麟主書者死爲之殯一日遇萬全問得其事導

至殆所慟絕良久乃裹應麟骨負以歸既卒吏爲之祠琢石表異孝

劉龍光字蓼蕭江南長沙人父廷諤仕明爲益王長史師下江西克建昌益王遁廷諤逃山中龍光以應試家居聞亂疾作居五年乃行詣建昌不得父母所在禱於神夢聞人語在石際語石際所在有女僧示以路行小徑萬山中經藤峽至白石嶺徑絕險攀援顛頓蒲伏上下嶺盡至石際於村民姚氏家遇其母廷諤已前一年卒居數月輿櫬奉母歸所居村曰見娘堡相傳宋王龍山於此遇母故得名云

李芳燦小字葵生湖南湘鄉人明季流寇至湘鄉當孔道三復三陷芳燦父母皆被掠兄弟死於兵者三芳燦收葬之棄家求父母所在行數年至貴陽遇鄉人必爲言父狀或謂軍中某所頗有狀似所言者詣求之果得父父脫軍中籍與歸再出又數年至寶慶暮投山家宿見二嫗操作其一方理炊乃似母芳燦自陳尋母狀嫗聞遽呼曰汝葵生耶吾卽汝母也蓋母避兵轉徙方從此嫗爲傭遂奉母還

唐肇虞江南人失其縣父卒肇虞尙幼晝夜哭母止之曰母哭能止兒勿哭耶順治初江南寇大起母被掠肇虞徧求諸村落及旁郡縣渡江北復南行數千里屢與寇遇僅乃免卒不得母至江南衆問所自來泣以情告一嫗前問曰若母非戴姓耶曰然嫗引至家則其母在焉相見大慟遂待母歸

繆士毅江南天長人父廊寶富順治十七年寇掠其家牛馬怨家誣以助寇廊寶見法妻子徙奉天士毅以後世父得免依從母以長旣聞父死母徙狀從母語之曰而母將行抱汝乳且言兒僅此一乳乳當飽生死與兒訣矣士毅聞號泣欲行求母恐去不得還先娶妻生子康熙二十二年乃決行至瀋陽遇族人同徙者知母在烏喇爲流人薛氏妻乃行求得母母不相識士毅具言姓名及兩女兄適誰某皆信相抱哭觀者多流涕母於法不得還乃辭歸居數年復往母又徙愛琿行未至聞母死求得母葬所遂居其側僧廬不復歸子秉文長躬至愛琿泣請歸士毅終不可又數年卒母葬所秉文乃發祖母瘞並持父骨還葬

陸承祺字又祉浙江仁和人父夢蘭客死鬱林方軍興逾年乃得問承祺與弟承祚號慟走萬里歷險阻僅得達視叢箐中敗棺刺血漉骨皆不入兄弟哭愈哀途中有知夢蘭者告其棺在佛寺兄弟從以往撫棺慟皆阻絕觀者嗟歎呼孝子持水飲之承祚徐甦承祺氣結不屬竟死承祚匱兩骸担以歸母王得承祚報知得夢蘭骨及承祺死狀悲慟不食七日未見承祚歸遽卒

汪龍江南歙縣人祖客死蘇州父往迎喪溺采石龍時六歲稍長聞祖喪未歸如蘇州求祖柩無知者久之遇灌園叟與徙其祖柩引詣殯舍諸柩縱橫匍匐始獲母竟未知也方如珽休甯人國初其曾祖避兵客死潛山祖前卒父不在側道梗喪未歸如珽既長問老婢言有族姑嫁程氏年七十餘訪之則嘗會其曾祖喪偕往蹤跡至黃石坂於洞中得收棺得白金簪族姑驗之其曾祖歛時物也乃負骨歸葬距其曾祖卒時已五十有六年矣

張巖福建連江人父震公家縣東岱堡海寇破岱堡張氏殲焉震公適他往獨

免歲方七歲爲所掠轉徙備于清漳康熙十年歲年二十餘矣時時念父母顧被掠時幼不審鄉縣以人謂其語音似連江而追憶父似名天貞乃走還連江數日無所嚮或問何爲以張天貞問震公聞之曰天貞吾亡弟彼焉識之走視問其詳挾以歸使見母繼追憶母容貌曰非吾母也震公曰汝母已死於賊此汝後母耳歲大慟爲母補行喪服三年而事後母如母

朱壽命江西餘干人康熙十三年遇寇與母李相失壽命日夜泣旣聞母爲禁旅所俘屬正藍旗壽命徒步走京師乞於市忍饑積錢將贖母久之得母所在而主者邀重購拒壽命壽命日踞其門外膝爲痺侍讀學士邵遠平高其行爲捐金以贖暫留遠平家母卞小不當意輒詬罵或捽而批其頰壽命益嬉笑居數月附舟還壽命不知書語質每言在母腹日嗽母血三合那忍不報

潘天成字錫疇江南溧陽人年十三遇家難父母挈子女出避仇天成行後幾爲仇所斃旣得免乃行求父母經青陽白沙廟宿廢廟聞虎聲爲詩述悲往來徽州富國所屬州縣跡父母所在至則又他徙天成行經村聚輒播發作鄉語

大呼至江西界母金自巷出就問之始相識乃得父及其弟妹皆無恙時天成年十五欲歸苦無資出行貸又六年使其弟從父歸天成奉母挈妹以行遇風雪負母行數里還抱妹往復跣行足流血入雪盡殷既歸出行販以養暇則讀書荆溪湯之錡出高攀龍門治性理之學賢天成天成從受業焉同縣許國昌遇天成尤厚使爲童子師鄰家兒冒母天成召其鄉老人呼兒共懲之兒悔謝乃已及父母卒游學桐城遂隸籍爲安慶府學生居二十餘年移家江寧天成學益進捐潔不以干當道終窮餓年七十四卒葬惠應寺側國昌子重炎師天成編刻其遺書爲鐵廬集

翁運槐字樹山運標字晉公浙江餘姚人父瀛往廣西道湖南一夕泊舟祁陽新塘失所在舟人求不得還報歸其行篋鎖在而鑰亡時運槐運標皆幼運槐年十三行求父不得以病歸運標雍正元年成進士與運槐復求父徧湖南境更二年不得一夕復泊新塘遇土人鄭海還言距今三十年弟海生墮水格敗葦不死視葦間有尸因瘞之白沙洲身有鑰在囊藏爲識乃遣力以囊鑰還鑰

與行篋鎖牝牡合囊則運槐女兄昔年製以奉父者也乃痛哭啟攢以父喪還葬而于壙處留封樹焉時雍正五年八月也運標謁選得湖南武陵知縣嘗有兄弟爭田訟運標方詣勘忽掩涕訟者請其故曰吾兄弟日相依及官此與吾兄別今見汝兄弟思吾兄故悲耳訟者爲感泣罷訟縣東隄圯水虐民縣又無書院運標爲修築民以運標姓名其隄與書院擡道州知州縣通郴桂鑿山八十餘里爲坦道疫親持方藥巡視曰我民父母子弟病奈何不一顧耶年六十卒官運標知武陵建祠白沙洲起鎬亭買田俾鄭氏世董之知道州拜祠下哀感行路

楊士選字有貞江南吳縣人方六歲入塾塾師爲說古人孝行輒窮其本末歸告父母兒他日亦當如是父商于河南喪資而病士選年十六往省渡河風雨士選泣禱得不覆人稱孝子母奉其父還里歲饑士選與妻唐食糠粃共營甘旨奉父母居喪營葬身穿緇負土唐爲姑吮疽

徐大中湖北潛山人潛山俗重風水大中喪母厝棺居室傍未葬乾隆四十七

年縣大水齧前和失其尸大中大慟水初退求尸于沙中得一足襪敗猶未盡色餘黃其母歛時裝也大中抱足泣路人見者語曰去此二里許樹上懸尸湮絲褻缺一足奔視良是但脫頤下骨負歸改歛忽有人若丐入其家曰吾拾得頤下骨取與合人傳爲異學官欲上其事大中曰我久不葬母乃避此禍我天地間一罪人耳舉我孝於及時葬親者謂何也堅卻之

沈仁業字振先江蘇吳縣人父賈于安南娶婦生子女仁業八歲從父歸而母爲外國女例不得入中國不能從仁業長而思母父卒乃圖父象渡海省母安南有兵事母挾幼子女竄山谷中仁業行求得之不食七日矣居二年有義其行者爲具舟舟入海颶作觸海中山仁業抱母泣風轉挾母過山至瓊州吏執例拒仁業母不得入仁業涕泗請莫應久之有老吏謂康熙間有故事檢文書得之仁業乃奉母及弟妹以歸

魏樹德陝西蒲城人父季龍出佐幕客游樹德猶在娠幼幼學母力針黹以活季龍久不歸樹德以嘉慶十五舉年於鄉乃行求父初聞季龍自福建轉客廣

東先詣福建求不得乃詣廣東遇知季龍者爲約略言葬處徧求之得志石荒冢中乃持喪還踰年母卒廬墓三年除高陵訓導求呂枋遺書授諸生久之以老乞歸卒

李汝恢江西廬陵人父仲鴻業醫游無方汝恢年十三出求父初至四川又至廣東皆未遇乃節日用得百金復出徧涉江湖遇仲鴻貴筑仲鴻有弟亦出游既歸日念弟汝恢乃更出求其從父得諸柳州仲鴻乃樂甚遽無疾而卒汝恢喪葬盡禮母痺奉事尤謹

鄭立本江蘇蕭縣人父相德坐罪戍新疆立本方四歲年十八辭母以求父母哭而戒之曰汝父左手小指缺一節中有橫紋幸相值以此爲驗立本貧無資乞且行至庫車聞父戍綏來綏來至庫車三千餘里張格爾亂未定官道塞乃裹糒求路獨行迷失道還庫車待亂定乃行至綏來則父歿已數年相德在戍授同戍子弟讀歿弟子爲治葬立本哭墓而病居二十年相德弟子力護視故得不死病起啓父瘞體久化左手獨存小指缺一節有橫紋如母言立本駭慟

聞其事者皆嘆異乃負骨歸葬往還凡八年同治中大學士曾國藩駐軍徐州聞立本事招往見立本舉孟子召役往召見不往語謝不往見國藩高其義檄知縣以時存問

李學侗山西介休人諸生父廷儀道光中客死貴州荔波縣有同行者歛而葬焉學侗志欲歸父喪貧客授十餘年積數百金始克行詣荔波時方亂貴州境亦騷動屢遇險乃達廷儀葬社稷壇山下或以爲先農壇語廷儀同行者音轉又以爲西龍塘學侗至求西龍塘無其地慟哭周行諸叢冢乃於社稷壇得焉學侗持喪還葬族人有客死而旅殯者並載以歸旣葬日必往視持盂飯以祭晚治易有所撰述

董士元直隸臨榆人父行健嘉慶中出關去三月而士元生行健遂不歸士元幼思父六歲嘗失所在翼日得之關外二里店母問其故涕泣言曰欲尋父也年十五賊商于奉天士元請于母從之往求父消息不能得越十餘年至阿什河有言十年前在三姓南淘洪嘗遇臨榆人董姓今不知在亡士元乃往淘洪

地僻行失道久之始得達舉父姓名里居問居人有知者曰是嘗漁於此死數年矣士元大慟得藁葬地發冢審視齧指血滴入竹函以歸至奉天乃具棺還葬居二十餘年母歿喪葬如禮至光緒初卒

李復新湖北襄城人崇禎末歲饑復新出糶於鄆土寇賈成倫劫殺其父際春復新歸痛甚誓復讐時方亂法不行而成倫悍甚復新乃謬懦示無復讐意成倫易之順治初復新始告官獄成會赦成倫得減死吏監詣徒所復新伏道旁俟其至舉大石擊之死詣縣請就刑縣愍其孝上府請勿竟獄且旌表其門府駁議謂成倫已遇赦減死復新擅殺當用殺人律坐罪縣有老橡復具牘上府曰禮言父母之仇不共戴天又言報仇者書于士殺之無罪赦罪者一時之仁復讐者千古之義成倫之罪可赦於朝廷復新之仇難寬於人子成倫且欲原貸復新不免極刑平允之論似不如是復新父子何辜並遭大戮凡有人心誰不哀矜宜贊以無罪仍旌其孝府乃用縣議表其門曰孝烈

黨國虎陝西富平人明末父兄爲族子所殺國虎方幼順治初國虎稍長誘族

子於野遇殺之並其子詣縣自首入獄知縣郭傳芳將貸之國虎念父兄仇已雪遂自經獄中唐時縣人梁悅復親仇傳芳立孝義祠首悅而配以國虎嚴廷瓚浙江烏程人父時敏族子陽以姑爲明大學士溫體仁妻怙餘勢時敏嘗斥其非陽陽與出游擠墮水死廷瓚稍長聞父死狀訟陽論斬陽賄上官反其獄得脫益肆廷瓚奉母避長興買斧誓復仇歲還里省墓遇陽陽嗜就之陽以爲畏己也母卒以喪歸方村演劇陽高坐以觀廷瓚直前斧裂其首斷項詣縣自首縣嘉其孝欲生之獄上按察使將援韓愈復讐議爲請廷瓚遽死獄中或曰陽家賄獄吏殺之

陸起鵬起鵬貴州安順人父希武明末水西安邦彥叛破安順陸氏舉室自焚希武與起鵬幸得脫起鵬自火中跳而出遇賊爲所掠居數月賊攻貴陽自開道出求父及弟未得順治初師下安順起鵬乃歸詢知起鵬所在鬻產贖以歸起鵬具言父爲邦彥黨羅戎所殺被掠鬻入土司中時戎已就撫起鵬兄弟訴父前爲戎殺事下巡道巡道判戎罰鍰起鵬始不肯受旣而曰不受金是使戎

知吾必報也乃受金我謂訟已決不爲備起鵬故善騎射結壯士七日夜伺戎隙一日戎以事入安順其徒皆從起鵬起鵬與七人者盟挾弓弩伏城外令所親醉戎既醉而出起鵬射戎中肩卽前所之七人者皆起盡縛其徒得與戎同殺父者四人剖心以祭父起鵬令起鵬走避戎黨訴巡道起鵬赴質抗辨不稍屈巡道釋不問

虞爾忘爾雪江南無錫人國初江南多盜爾忘爾雪父罕卿董鄉團捕盜盜恣焉一日自縣還聞門外呼罕卿出爲盜縛去爾忘爾雪方田作聞馳救罕卿死橋下矣爾忘爾雪既葬父仍董鄉團乃更其初名忘警忘仇雪冀雪恨也每獲盜必詰執殺罕卿者久之知爲盜杜息息方謀入海與所左右二人夜治行爾忘爾雪詢知之將壯士奄至息家繫息及二人者至罕卿死所比明爾忘抱罕卿木主至爾雪于其旁焚釜爾忘取息舌爾雪探心肝且祭且噉爾忘乃斷息頭將刃二人者一誓死一乞哀沈諸河爾忘爾雪持息頭懸罕卿墓時距罕卿死方踰月

黃洪元江南丹陽人父國相與同里虞庠不相能方社國相被酒夜行庠遣惡少紡而沈諸河洪元與弟福元皆幼稍長數聞父死狀庠欲壻洪元以自解洪元巽言謝之母喪既葬洪元福元同誦庠所在又值社洪元見庠在社所還呼福元各持斧往洪元入迫庠字庠曰逸羣我死汝庠起猶曰孺子醉耶洪元曰將醉汝血兩斧並舉遂殺庠詣縣自陳狀有司義之免福元下洪元獄明年亦赦出爲浮屠以終頤中和吳縣人父宏仁順治初怨家周昌乘亂誘而殺之棄其首中和礮斧束縶如人形書昌姓名以試斧昌聞之輕中和幼不爲備中和懷斧出跡昌直市中尾之行稍前遽揮斧中昌昌左右顧又斧之母遣其兄孟和走視弟昌已死乃相與詣縣兄弟爭自承殺人市人言殺昌者實中和乃下中和獄明年巡按御史錄囚釋中和中和明義士佩韋從孫也同時又有顏鼈父仲常國初爲其仇金瑞甫所殺鼈淬刃挾以出入一日遇諸省口鼈刺瑞甫入水鼈從之瑞甫脫去誣鼈以盜兵備道王紀同知劉瑞訊得實爲誅瑞甫中和復仇時年十六鼈年十八

王恩榮字仁庵山東蓬萊人縣有小吏寵于官恩榮父永泰與有隙被毆死恩榮方九歲祖母母皆劉氏祖母以告官不得直畀埋葬銀十兩內自傷遽縊母泣血三年病垂死以官所畀銀授恩榮曰汝家以三喪易此汝志之不可忘恩榮依其舅以居稍長補諸生志復仇以斧自隨其舅戒之曰汝志固宜爾然殺人者死汝父母其倖矣乃娶妻生子辭於舅挾斧行遇小吏揮斧不中投以石仆得救免父遇於門直前斫其首帽厚傷未殊訴官時去永泰死十九年事無證恩榮出母所授銀其上有硃批旁鈐以血書知縣歎曰孝子也吾欲聽爾違國家敕令吾欲撓爾傷人子至情周官有調人其各相避已耳於是恩榮哭堂上下皆哭小吏避之棲霞居八年一日方入城過小巷恩榮與遇小吏無所逃乞貸死恩榮曰吾父遲爾久矣斧裂其腦以足蹴其心死乃詣縣小吏家言永泰故自縊非毆死當發棺以驗恩榮曰民願抵罪死不願暴父骸叩頭流血知縣詰於衆皆曰恩榮言是具狀上按察使按察使議曰律不言復仇然擅殺行凶人罪止杖六十卽時殺死者不論是未嘗不許人復仇也恩榮父時死未成

童其後屢復仇不遂非卽時猶卽時矣况其視死無畏剛烈有足嘉者當特予開釋復其諸生有司將請旌其勇爲辭罷

楊獻恒山東益都人父加官與濟南楊開泰有隙置其門開泰訟焉加官率獻恒走求援開泰遣其徒給使出小徑要而歐之加官死焉獻恒死復蘇開泰以他事誣之下濟南獄山東初設總督獻恒訟焉下青州府勘問直獻恒開泰以賄免獻恒走京師叩閣下山東巡撫會鞠罰開泰納埋葬銀四十兩迫獻恒具領獻恒藏銀典肆再走京師叩閣下山東巡撫以獄已定罪獻恒妄訴咨四十開泰計必欲殺獻恒遣其子承恩至青州謀諸吏獻恒潛知之持鐵骨朵挾刃至所居承恩方與吏耳語伺其出以鐵骨朵擊之仆急拔刀斷其喉又挾其睛啖之詣縣自陳出所藏銀爲證縣具獄得末減遣戍

任騎馬直隸新城人父爲仇所戕死以四月八日方賽神被二十八創騎馬時方幼至七歲問母得父死狀慟憤以爪刺胸血出悲至輒如是以爲常其仇姓馬因自名騎馬長慮仇且疑乃字伯超詭自況馬超也母欲與議婚力拒母死

治葬且營祭田年十九四月八月復賽神騎馬度仇必至懷刃待於路仇至與漫語指其笠問值騎馬左手脫笠授仇蔽其目右手出刃急刺洞仇胸亦二十八創乃止仇妻子至怖甚騎馬曰吾殺父仇於汝母子何與乃詣縣自首知縣欲生之曰彼殺汝汝奪刃殺之耶騎馬對曰民痛父十餘年乃今得報之若幸脫死謂彼非吾仇民不願也因袒出爪痕殷然見者皆流涕獄具得綬決在獄十餘年知縣嘗使出祭墓辭怪而問之曰仇亦有子假使效我而新我我死分也奈何以累公新城人皆賢之請于縣築室獄傍爲娶妻生子久之赦出知縣後至者欲見之輒辭聞其習形家言以相宅召又謝不往曰官宅不同於民若言不利且興役是以吾言擾民也既卒總督曾國藩旌其廬曰孝義剛烈

李巨勳甘肅禮縣人回亂土豪羅五殺其父巨勳欲赴死母以弟幼沮之命之娶不可乃訟五五繫獄始娶生子五以賄出獄巨勳與弟恆挾刃伺五光緒初竟擊殺五巨勳自首繫獄死母不食亦卒妻張撫孤子成立

任四甘肅渭源人農也徙家狄道父死於虎四乃習鳥槍誓殺百虎報父仇遇

虎槍一發立殛隣縣有虎輒迎四往捕必得四已老計所殺虎九十有九復入山伺虎虎驟至槍不及發幾爲所噬俄雲起晝晦虎自去四歸祭父戒子孫毋更讐虎遂以無疾卒卒時猶寢虎皮也

王國林湖南長沙人有膂力虎噬其父國林奮擊折虎左牙虎怒爪其腹腹破腸出尺許而父卒死國林死復甦家人納其腸爲縫腹得愈乃制火器獵虎最後獲一虎左牙折知爲噬父者烹之告父墓

藍忠福建漳浦人家萬山中父元章與叔裕比屋居有虎夜出中伏弩跳踉入所居村裕夢中聞虎至呼虎撲門不得入登屋毀杙梯直下齧殺裕元章聞裕爲虎殺復呼虎循聲至破屋撲元章仆忠持長刀直前刺虎中喉刃入腹三尺許虎舍元章撲忠忠拔刀柄脫妻卓搯虎頸連呼曰斧忠自門後取斧力斫之天明力且盡視虎已殛元章尙臥地忠爲妻扶就寢越日創甚竟死

清史稿

列傳

孝義三

岳薦

張厥

黃學朱

吳伯宗

錢天潤

蕭良昌

李九

張某

程含光

陳福

通判 長江 黃成 寓

任天篤

趙一桂

貢 調鼎

楊藝

成 訓

李晉福

胡 通友

朱永慶

王某

張瑛

郭氏僕

胡穆孟

苑亮

楊越

子 訓

吳鴻錫

韓瑜

程增

李應卜

勒塞

王聯

黎侗

李榮道

趙璫

蔣堅

李林孫

高大鎬

許所望

邢清源

王元

鳳瑞

方元衡

葉成忠

楊斯盛

武訓

呂聯珠

岳薦江南山陽人明末爲諸生事父母謹居喪哭踊氣息僅屬乃病羸終其身
庶弟甫生而其母暴疾死薦亦生女乃令妻棄女而乳其弟弟病瘍日夜啼夫
婦迭拊之遂俱生瘍血淋漓被體不以爲苦

張厥陝西盩厔人順治初山賊破其堡殺厥兄厥並掠厥子去厥怒厥死且無

後負其子入山易廠子歸方謀贖子山賊引去其子幼不能從遂殺之厥復生子與廠子並成立

黃學朱福建甌寧人諸生順治間縣有土寇執學朱及其弟度不能兩全乃給賊曰家有薄產釋弟歸鬻產以其直贖我何如賊疑欲遣學朱學朱曰我秀才質重于弟賊遂釋弟歸實無產贖不至學朱遂被戕

吳伯宗山西稷山人早喪父母二弟幼與相依居數年先後皆失之伯宗求弟徧遠近久之得季弟京師爲高氏僕高氏遇之厚曰吾爲子善撫子求得仲弟與之俱歸又久之伯宗得仲弟消息在甯古塔乃躬往蹤跡之仲弟屬將軍部投牒訟焉庭質辭未畢伯宗忽躍起主者怒扑之血被面伯宗徐曰民非敢與抗適見略吾弟者奴吾弟者皆法所不宥顧美衣帽平立官側民兄弟良家子爲奸人誘掠萬里投命官不明其冤乃視若罪囚使跪而聽命民是以不服主者悟自將軍歸其仲弟時正冬兄弟相扶行冰雪中至京師與季弟同歸

錢天潤江蘇宜興人少孤爲人傭耕得錢必奉母母死以奉其兄有女弟嫁而

寡甥二方幼天潤往視之女弟泣言夫死子幼不知所以爲計天潤問其意女弟言願守節第苦貧天潤曰妹無憂吾助汝遂爲女弟耕以給食三年女弟死撫二甥畢姻娶

蕭良昌湖南邵陽人家貧貿漆事父孝兄弟四良昌其少季析居伯仲叔皆有子子伯仲早卒叔攜其子出游良昌召伯仲子與同居率之貿荆襄間家漸起始娶婦歲除具酒奉父父語良昌曰兒能撫存孤姪甚善願安得汝叔兄父子復還耶良昌跪白父曰兒欲行求久矣明歲遂行時傳叔兄在雲南良昌行六閱月資且盡途窮哭泣目盡腫晨行至一村遇曉汲者則叔兄子也乃與見叔兄偕歸父乃大慰年八十餘乃爲諸子析居厚兄子而薄其子其子亦受之無間言

李九江蘇嶺榆人家青口兄七與其隣爭地而訟知縣吳蔭元納隣賕逮七下典史費長春加楚毒焉七自經死九誓雪兄枉訴州不得直訴監司獄下州仍不得直走京師訴都察院命下江蘇巡撫蔭元長春賂承審官責九健訟加非

刑而令九所親關說昭以重利九不應九憤且楚發病藍元等賄醫將毒九會按察使陳繼昌至親鞠九得直獄成黜藍元成長春誅縣役二九歎曰兄枉雪死無憾歸未至卒青口士民具鼓樂迎其喪

張某甘肅通渭人兄弟皆貧爲木工相友愛將析產兄曰均之弟曰弟子一而之子五如兄言弟子則富矣諸姪獨非父母孫乎當視人爲分兄曰不可父母先有子未嘗有孫議不決乃析爲三兄二而弟一兄弟皆逾八十常言誰先死必呼與俱去兄卒弟慟幾絕不食七日亦卒

程含光安徽休甯人出游得資以養親嘗偕弟自六安歸策蹇經弱嶺日暮風起虎突出攫弟去含光驚墜地持短鞭力追左手據虎頸右以鞭捶虎大呼震山谷虎舍弟崛吼含光負弟疾趨投嶺下旅舍弟息僅屬灌以湯徐甦肩創十餘血淋漓人言虎牙毒血不盡且死含光吮之血盡出乃瘥其後含光卒弟每言遇虎事解衣示人輒流涕不已

陳福福建永春人居西溪同居十二世家範簡肅世以一人督家事子孫率教

醇樸未有訟者譙衿湖南沅江人同居七世有家訓二十條喪祭無失禮黃成富福建連江人同居六世子弟各執其業方田作諸婦儲以一婦守家視臥兒於筐飢則哺不問何人子懸衣於桁共衣之垢則澣不問何人衣雍睦無間言李長茂福建海澄人同居四世建祠置祭田立義學著家規法戒各十條示子孫子五福順治六年進士官刑部侍郎兄弟八人皆友愛

任天篤河南偃師人乾隆中巡撫何裕成言天篤九世同居高宗賜以詩寶鏐帛表宅里初天篤祖開昌生五子欲定議不析產觀諸子意納金麥困中子士堯士舜得以告開昌曰此天賜汝二人取之以子無私蓄對開昌悅乃定議不析產宗經傳爲家訓教子弟毋侈毋怠利母入城市毋傳述時事務耕田讀書惟許學醫亦母取酬不則執百工業以佐家婦初至長者以家訓教之不率令暫還母家悟乃迎歸平居布衣椎髻操作母私饋母飾容觀母適私室年五十不執役寡母入厨稍厚其衣食女適人寡母再嫁至天篤上溯開昌祖光玉下見玄孫瑞豐通九世男婦百六十餘人共爨吏問天篤何術能不析產天篤曰

不忍也人傳其語謂視張公藝書忍字義尤大而遠其後傳麟瑞張璘皆以七世同居賜詩旌獎麟瑞魯山諸生璘涇陽諸生

趙一桂不知其邑里崇禎末以省祭官署昌平州吏目被檄爲莊烈帝后營葬師入關定京師列狀申州略曰三月二十五日奉順天府檄穿田妃壙葬崇禎帝后四月初三日發引初四日下窆州庫如洗葬日促監葬官禮部主事許作梅無策職與義士孫繁祉等十人歛錢三百四十千僦夫穿壙至初四日美道開通啓壙宮門入享殿三間陳祭品中設石案一懸鐘二旁列錦綺繒幣五色具生存所用器物匱具皆貯以侏紅木笥左傍石牀一牀上擺衾衾枕又啓中美門內大殿九間中爲石牀置田妃棺槨帝后梓宮至停席棚陳羊豕金銀紙鏤祭品率衆伏謁哭盡哀職躬督夫役移田妃柩於右奉周皇后梓宮於左乃安先帝梓宮居中先帝有棺無槨移田妃槨用之梓宮前各設香案祭器職手然萬年鐙度不滅久之事畢掩中美閉外美門復土與地平初六日又率諸人祭奠號哭呼集居民百餘人存土起冢又築冢牆高五尺有奇幸本朝定鼎爲

先帝建陵殿三間繚以周垣使故主陵寢不侵樵牧雖三代開國無以加之一
時歛錢者繁祉諸生劉汝樸白紳徐魁李某鄧科趙永健劉應元楊道王政行
皆州民康熙中嘉興譚吉璉至昌平得故吏牘探入所爲肅松錄邵長蘅又爲
之文謂是時李自成據京師禮部主事改禮政府屬蓋一桂不知自成所改官
制面而政行有子乞韓炎表墓亦書其事黃調鼎字鹽梅河南洛陽人諸生其
女兄明福王由崧妃也早卒葬洛陽福王稱帝南京追爵妃父奇瑞洛中伯以
其長子九鼎襲亦官調鼎福王選立后妃巡撫山陰郝彪佳之女與焉命以彪
佳少女妻調鼎南都破九鼎降馬士英挾福王母郝太后至浙江兵敗太后匿
山陰民家調鼎走依郝氏與相聞福王死京師求得其柩載歸洛陽塋故妃園
迎郝太后奉養至卒葬福恭王園調鼎棄諸生不出

楊藝字碩父廣西臨桂人大學士翟式耜客也閩略無所忌諱同幕者稱爲癡
藝因以自號己終不合去孔有德徇廣西破桂林執式耜及總督張同敞不屈
死藝衰絰懸紙錢滿衣號哭營市間請歛式耜有德聞而義焉遂許之令並歛

同敵有姚端者式耜門人藝與謀欽式耜及同敵淺葬風洞山麓築室於旁守墓不去時明給事中金堡去爲僧將上書有德乞欽式耜等知藝先之乃罷以書稿寄式耜子頗流傳人間而罕知藝者堡紀其事甚詳且曰以吾書掩藝吾爲竊名翟氏子爲負德咸默字大咸江南山陽人明諸生侍郎左懋第客也福王遣懋第等詣京師默與司務陳用極劉將艾大選游擊王一斌都司張良佐王廷佐守備劉統從使事畢留勿遣大選從令薙髮懋第怒笞之自殺南京破懋第與用極一斌良佐廷佐統皆以不屈死默送懋第喪歸葬萊陽又送用極喪歸葬崑山一斌等爲淺葬京師郊外默託堪輿術游四方嘗作哭萊陽詩以弔懋第淒楚人不忍讀

李晉福直隸景州人事諸生趙遵譜爲僮師入塞略地至州遵譜方出游騎而行晉福從倉卒被掠去家人不知也越數日晉福潛還告家人卽復從遵譜出塞遵譜馬爲人奪與晉福徒跣行久之有騎過則遵譜馬也遵譜直前欲奪之騎者抽刀斫遵譜仆幾死晉福負歸爲裹創僅乃得愈遵譜怒直晉福力戒毋

負氣取禍在兵中稍久相習晉福弟遵譜有勞役必代之後三年得間遣遵譜亡歸歸一年晉福亦逃入塞胡端友湖南甯鄉人劉光初僕也順治初光初妻胡遇寇以幼子付端友端友負而逃寇逐之力奔得脫至其家釋負仆久之乃蘇胡死於寇其子得成立至乾隆中丁近二千劉氏祀端友於祔

朱永慶字長源順天大興人故明宣府巡撫之馮子也師入關永慶見俘隸漢軍正黃旗僦屋居永慶修幹美髯負氣節好佛主者賢之將賜以婦命視諸俘恣所擇武進楊兆升仕明官給事中起兵死妾姚見俘薙髮矢守節永慶夙聞之乃自名故殉難宣府巡撫子擇姚以請引歸所居室向夕姚拜永慶乞哀永慶曰吾將全夫人節非特哀之而已乃誦佛至旦凡三夕居停覘知之間曰君不近婦人安用此贅疣永慶曰此縉紳婦吾非欲妻之欲完其節耳恐機洩故且同室然非誦佛不可乃爲君偵得幸終爲吾諱居停感焉乃治別室以居姚久之事聞於主者主者益賢之令姚寄書其家以其母若弟來予資遣之還王某江南如皋人隸也順治初縣人許德溥坐不薙髮死妻當流王欲脫之思

不得其策夜不寐其妻怪問之語以故其妻曰此義舉也然非得一人代不可王曰安所得代者其妻曰吾當成子義舉願代行王伏地叩頭謝乃匿德溥妻而以其妻行行數千里至流所縣人義之歛全贖歸夫婦終老於家

張瑛字玉采山西汾陽人居西官村順治六年姜瓖亂衆刦東官村趙氏盡殺其人獨一子亡歸瑛瑛納之衆索焉瑛不與瓖亂定瑛助趙氏子訟於官誅刦者當亂急村人將走避瑛曰賊未至先走能保必全乎孰若爲守計衆曰如無警堡何瑛曰警堡誠不可猝爲環村而溝焉其可遂爲溝務深廣瑛家有樓貯村人財物其中旣而賊大至踰溝村人退保樓瑛見賊渠據胡牀坐而指揮發石中之立斃餘賊怒攻樓取薪將焚衆汲井以救持數日乃稍稍去瑛率衆出擊之賊奔潰村以得全瑛家饒歲終必出粟周鄰里康熙三十六年饑縣民鬻田貶其直瑛輒收之得田且千畝明年大穰瑛榜諸村曰願贖者聽不十日盡贖去瑛卒年九十有一

郭氏僕失姓名山西聞喜郭景汾家僕也姜瓖反縣人章惇爲亂殺景汾祖及

父景汾方三歲僕負之走得免環敗惇降得官景汾讀書成進士上僕義被旌
景汾圖復仇顧惇已遇赦知縣邵伯麟爲之解今惇謁景汾祖父墓且詣景汾
謝居無何景汾擊殺惇斷其首祭祖父而身詣獄伯麟義景汾具獄辭言惇謀
反景汾率衆擊殺之大吏覆讞惇謀反事無有乃坐景汾擅殺伯麟意出入人
罪皆論死踰年遇赦減死戍福建耿精忠反官景汾事定逮京師以從逆見法
僕自聞喜走京師爲具歛惇子訐僕不當收罪人尸下刑部僕言某負三歲主
艱難萬死中辱以義被旌景汾雖被罪死固某主也主死僕不爲之收是爲無
義某願死不敢負前旌獄上聖祖哀而宥之當精忠官景汾亦欲官伯麟景汾
言是不辦一縣令何能爲遂不用以是免

胡穆孟福建人失其縣順治間武舉與連江沈廷棟同歲相善耿精忠反徵穆
孟避匿廷棟家廷棟寓書於其友詆精忠穆孟竊見之慮書發且得禍易書爲
隱語避者得書猶以詆精忠見收穆孟以語其妻王王謂當自承以脫廷棟穆
孟乃詣吏吏使與廷棟各具書辨其蹟釋廷棟而殺穆孟穆孟死王詣市綴穆

孟首具衣冠爲歛屬子於其叔且及廷棟遂縊於尸側市人皆感泣師克福建卹穆孟蔭其子焉

苑亮江南亳州人事州人韓斌爲僕斌舉武科授福建興化守備耿忠精反脅招斌亮度精忠兵所置堠爲邏者所執問誰何亮自陳言斌家被籍南來投斌主者監亮見斌而不許交語亮僞遺履斌發視得之芳札乃單騎詣之芳降亮陷賊中被刑訊終不言齋札卒遂死之芳作傳表之

楊越初名春華字友聲浙江山陰人所居曰安城因以爲號爲諸生慷慨尙俠康熙初越友有與張煌言交通者事發辭連越滅死流甯古塔例僉妻與其妻范偕行留老母及二子家居甯古塔地初闢嚴寒民樸魯越至伐木構室墾土石爲炕出餘物易菽粟民與習乃教之讀書明禮教崇退讓躬養老撫孤賙入官爲奴者蕭山李兼汝蘇州書賈朱方初及黔沐氏之裔忠顯忠頑皆廩焉又賙明大學士朱大典孫婦河南李天然希聲夫婦凡貧不能舉火及昏喪倡出

資以賑民相助恐後客則嗤之曰何以見楊馬法馬法猶言長老以敬越也母終於家年餘始聞喪哀慟杜門居三年子寶出塞省越越初成年二十四至是已六十八寶還叩閣乞赦越事未行子寶復出塞省越又二年越卒於戍所例不得歸葬寶寶請不已又二年乃得請迎范奉越喪以歸民送者哭填路寶撰柳邊紀略述塞外事甚詳

吳鴻錫字允康福建晉江人父德佑康熙初客浙江兵部郎中噶尼布奉命督造戰艦延德佑入幕數月德佑卒鴻錫方七歲噶尼布携至京將子之鴻錫請呼以伯曰父一而已噶尼布奇之曰七歲兒能辦此耶噶尼布故廉家漸困鴻錫爲督芻牧私市書冊弓矢習之通滿漢文精騎射噶尼布從兄雲麟以平臺潛功授溫州參將至京師欲以鴻錫行噶尼布諾之鴻錫流涕曰我七歲育於公今我壯而公老公子幼必俟其成立我乃歸鎮國公海清噶尼布壻也義鴻錫俾入旗噶尼布卒妻哀甚得狂疾子和順和鼎和麟和順纔七歲鴻錫爲治喪持家政延師教和順兄弟稍長爲娶婦和順年十六有忌之者授以護軍將

困苦之每直宿鴻錫佩刀以從露坐終夜大學士阿蘭泰爲噶尼布故交鴻錫率和順兄弟候其門和順試除中書師征噶爾丹和順從軍以功擢禮部主事有召和順飲者佐以博鴻錫持刀逕入坐以和順歸他日或問鴻錫人可殺乎鴻錫曰殺人罪不過死吾受撫孤託而坐視其弱於燕朋誠生不如死死而諸孤知勉則死賢於生矣和順自是不復與人飲山東饑遣官治賑和順與焉鴻錫從之武城廩未發出私錢散米又慮飢者驟飽且致斃淪萊菹飲之全活無算和順尋權密雲關鴻錫曰負販小民不得取其稅額不足可以家財補焉民僮趨之額亦足和順習舉業鴻錫督之慮其怠穴几貫鐵索自繫守之和順箴謝讀益力以副榜貢生得官和麟年十六鴻錫偕詣永定河効力水大至巡撫于成龍夜行隄上見有向河拜且泣者問之鴻錫也解衣旌之工竟和麟讓叙筆帖式擢刑部郎中鴻錫不得歸募工寫父母遺象檢父遺衣冠招魂葬之年五十八卒和順兄弟去纓席地如父母喪

韓瑜字玉采山東濰縣人少孤事母孝母沒哭泣三年旣除喪祭墓未嘗不哀

年八十如故冠時母有衣一襲弄篋中寶祭則服之衣敝不棄將卒命以歛猶舉孟郊詩曰此慈母手中線也事兄謹兄弟皆八十無改常度產不過中人好施予多蓄書遇寒士則遺之族黨長不能昏娶喪不能葬必俟以資族子貧賻以秭十石使居賈得贏倍以償不受康熙四十三年饑民鬻子女罄所蓄得九人不立券歲豐悉遺還之卒時八十有六

程增字維高江南歙縣人父朝聘自歙移家安東歸省墓病作增冒風渡江六日夜行千五百里至則朝聘已沒母唐病復作急還又已沒乃絕意仕進安東地卑母匿在堂水大至增與一僕力升閣木案上既葬復移家山陽爲買而使二弟就學父母之黨死而無歸者畢葬焉餘皆定其居使有恒業析田立塾以養以教友有急難以千金脫之後更相背窮復來自解待之如初康熙初河淮溢增出家財修邳溝兩岸隄十里河道總督張鵬翮以聞四十四年聖祖巡視芒稻河召增入見書旌勞二字以賜兩江總督于成龍好徵行奸人因造言傾怨家獄或失入增謁成龍力言其弊指事爲徵成龍曰徵子言吾安知人心抗

敝至此久之卒

李應卜河南邙縣人早失父母叔丕基遺側室事如母壽百歲終姪緯孤飲食教誨之病作必數視之曰我夜不能起然終宵未成寢也弟應會亡病甚一夕鬚髮皆白姪緝幼食必呼共案出必視而行返必問在何所施及於鄉人有典其田而遠游者以子託焉久之爲娶婦且復其田有喪其妻者爲之復娶予田俾資以生有貧欲遠徙者予之粟留勿徙有傭於其肆負金病且死者爲之獨其逋厚給其妻子有持金入其肆市粟者視金有官封與粟遺之去持金詣縣庭知縣方以庫失金咎吏應卜以金上具言始末事乃白乾隆二年縣舉應卜行事上大吏請旌表其門曰義士

塞勒滿洲人官苑副與惠色友塞勒老無子時引以爲戚惠色曰我已有二子今婦又有身男也爲君子已而得男命曰奇豐額既免乳以畀塞勒塞勒與其妻撫以爲子年十六將應童子試當具三代塞勒曰吾甯無子不可改祖宗欺君父乃携奇豐額還惠色奇豐額初不自知惠色子塞勒語以故駭馬去奇豐

額遂還爲惠色子乾隆三十四年成進士授刑部主事累遷江蘇布政使塞勒及其妻相繼卒五十七年奇豐額擢江蘇巡撫入覲涕泣陳本末請以本身封典地封塞勒並以第三子廣麟爲塞勒後上命具疏下部議皆不許上特允之奇豐額黃氏先世朝鮮人隸內務府滿洲正白旗坐事罷官終內務府主事

王聯字鷺亭江蘇泰州人諸生應乾隆四十五年江南鄉試聯與友沈某偕沈病於喉欲歸聯不入試送之還至龍潭沈病益劇聯伴之寢病者口腐穢觸鼻不問與行慮其顛徒步翼以行沈遽死輿者欲散聯以義感之乃得至丹徒殯於僧寺以其匿歸論者謂新唐書以張道源送友尸歸里列諸忠義傳聯亦其亞也

黎侗安南人故安南國王黎維祁之族也乾隆間廣南阮光平破安南侗護維祁叩關乞援上遣孫士毅率師送歸國旣復爲光平襲破維祁出走侗齎上所賜國王印走間道入關與段旺等二十九人俱上命薙髮分置江浙諸地獨侗與李秉道等四人不肯從其一爲黎馴亦維祁族其一失姓名四人者堅請得

出關爲維祁復仇上已受光平降不欲更爲黎氏出兵謂侗等忠於黎氏不以盛衰爲去就諭福康安平心詢問士殺尋奏侗假託忠義意圖構釁上命侗等從維祁至京師令軍機大臣傳詢侗等力請還黎氏故土誓以死殉上曰侗等仍還安南或爲光平所戮朕心所不忍命暫繫刑部獄維祁卒葬京師郊外仁宗卽位命釋四人者使居外火器營嘉慶八年農耐阮福映併安南使上表乞封侗子光倬在行侗與秉道至涿州逆焉仁宗責其私出下刑部侗等初自承出謁維祁墓旣乃具言願得歸國並以維祁喪還葬上許之資以銀並諸黎氏舊臣入漢軍置內地者悉遣還

趙璫字雨亭安徽桐城人倜儻重然諾有葉陽者與有連官大名同知璫往客焉甫踰月陽坐事成伊犁童僕皆散走陽父母老且病日夜泣璫請與俱行旣至將軍愛陽才置幕中璫乃辭歸陽泣璫曰勿爾吾且再來歸一年陽母卒璫復往比出關聞陽從將軍移駐塔爾巴哈臺改途赴之將軍聞賢璫稱曰義士以此趙義士名著關外有葉椿者陽同族也亦戍伊犁璫再出關椿母附寄子

書致金璫既改赴塔爾巴哈臺未至伊犁歸道呼圖壁遇巡檢陳斌亦皖人也因迹椿則死久矣璫曰椿母日夜望子歸乃今死當奈何且以金附我者爲我能致之也義不忍空返其金令椿骨不還顧金少盡吾橐中資猶不足又當奈何貨於杖迂道八千里載椿柩以歸

蔣堅字非磷江西鉛山人幼卽有智數七歲從叔入寺廡坐縣役值與語謂某寺僧被殺不得其主名堅語其叔曰殺人者堂上老僧也方誦經屢顧意乃不在經役牽去一訊而服十七附舟經瑞洪有少年同舟當食必出避堅疑而問之少年自言貧不能償舟值舟人將不余食焉故出避堅邀與共食資以金其人後客死又策返其骨及餘金長習法家言佐幕山西屢雪疑獄康熙五十二年主澤州知州佟國璫臨汾民迫奸胥爲變巡撫檄國璫往按堅從國璫以七騎往至則衆保山洶洶堅以巡撫令箭先諭衆國璫入縣執胥擾民者五六笞之流血衆就觀歎謀悉散國璫乞休堅歸數年間國璫以屬吏虧帑逮下太原獄責償數千金堅往省爲國璫徵債樂城又至澤州貸於州民爲國璫輸償獄

乃解堅嘗曰法所以救世心求人之生斯善用法矣著求生集子士銓文苑有傳

李林孫河南襄城人乾隆末教匪起將攻河南會城是時布政使馬慧裕主城守顧無兵度無以禦有陳伯瑜者郟縣人嘗爲河南巡撫客先事言教匪且起以妖言下獄川楚亂作諸大吏禮爲上客友林孫言於慧裕使率鄉兵五百人助守教匪至伯瑜以二百五十人面水肄戰匪易其少就觀之林孫以二百五十人出其背夾擊大破之知縣林嵐乞其兵守盧氏教匪渠張潮兒來攻號十萬嵐兵不及二千莫敢進嵐謝其衆曰公等皆林孫人徒死無益指大樹曰我官也死是間耳衆怒曰誰無面目者致公爲此言今日戰有不勝賊而生者擗大石破腦死嵐拜衆亦拜遂戰賊幾殲人或以兵家言問林孫林孫謝不省曰豪傑無他得人心耳

高大鎬湖南桃源人父陞臨淄知縣嘉慶初大鎬將僕王明省父歸道荆門遇教匪大鎬從容語使引見其渠渠疑爲官軍謀欲殺之大鎬自言我盜也奈何

殺我渠使與其徒角殺三人乃錄與其徒伍渠令攻宜城大鎬從行度溪匿橋下得脫遇餘寇又殺三人乃走宜城白吏言寇且至爲畫城守策大鎬在賊中久知賊畏飛石令盡發市衢街道民家階墮碎之置城上寇至見有備乃走吏欲叙大鎬功大鎬辭歸桃源王明在賊中不與大鎬相聞旣爲官兵所俘讞非盜釋之亦得歸

許所望字叔翹安徽懷遠人諸生工爲詩嘉慶七年冬宿州民王朝明李勝才爲亂州破所望與其戚王冠英出粟三千石佐軍且率其徒邱惠齡張國綱謝崇訓等破賊陳家集十八年秋林清亂起師圍滑縣兩江總督百齡駐徐州安徽巡撫胡克家駐亳州爲備歸德盜楊七郎據引河集其黨洪廣漢據保安山與潁州亂民沙占魁等遙相結觀變克家知所望以書招之所望率八百人至亳州以惠齡等十人爲隊長所望謀曰楊七郎猛且狡宜以計誘之令國綱崇訓率健兒八人僞爲逃卒詣七郎越五日誘之出以百餘人至邱家集七郎忽疑曰若爲許所望來耶崇訓出不意斷七郎臂衆大驚國綱疾呼曰我張國綱

也立擊殺數人國綱與惠齡同破宿州賊以勇聞賊素憚之遂大潰所望率兵至七郎走死廣漢亦潰占魁等走永城會師克滑縣餘賊走與合焚會亭所望與戰公基湖列十火槍土埤上令衆伏地曰賊至二百步槍發乘煙疾進擊之賊潰奔逐之數十里亳州師乃罷百齡在徐州亦得河南張永祥者以鄉兵三百助守事定所望辭叙功以諸生應試如故永祥從巡撫阮元自河南移浙江亦罷去人呼爲張鐵槍云

邢清源曹州人入鎮標爲兵數十年老而退伍咸豐十一年長槍會爲亂圍曹州時親王僧格林沁駐軍濟甯欲乞援無敢齎書往者清源請行乃裂帛爲牘置清源衣帶清源破衣持竹杖爲丐者狀出圍達王所王卽札示發兵狀仍置衣帶還報兵至城得全王元杭州旗營牧馬人也粵寇陷省城將軍瑞昌守旗營令元持書突圍出乞援張玉良大哭不食玉良義之立進兵瑞昌夾擊遂復省城明年城再陷元已保營官戰歿長安拊祀瑞昌祠

鳳瑞字桐山瓜爾佳氏滿洲正白旗人乍浦駐防粵寇來犯與兄麟瑞戰禦城

陷麟瑞陣歿見忠義傳鳳瑞改隸李鴻章軍轉戰江浙屢有功而太倉一役尤著初李軍以乏餉不用命鳳瑞力保盜魁賀國賢國賢本鹽商官誣殺其兄乃爲盜鳳瑞與其兄善責以大義立出十萬金助餉並率所部奮攻城遂克太倉州國賢後官至總兵鳳瑞以筆帖式積功累保副都統賞花翎江南平調歸杭州遂隱居不仕時難民遍地鳳瑞先於上海青浦設廠施衣食爲謀棲宿分遣歸里復奉詔招集旗人歸防安插恢復營制建昭忠祠立忠義墳凡杭乍兩營死者逾萬人尸骨狼藉躬督檢埋分建兩大塚於兩地勒碑致祭列入祀典又采訪姓名彙刻浙江八旗殉難錄乍浦副都統錫齡阿全家同殉其僕石某獨負其幼子出乞食養之鳳瑞見而言於巡撫薛煥奏請撫恤爲賦義僕行給資送歸鳳瑞義俠好行善歲收租穀數百石必盡散之窮乏數十年如一日衆稱善人卒年八十有二贈將軍鳳瑞博學工書畫遊跡遍天下嘗自刊玉章曰讀萬卷書行萬里路著有老子解如如老人詩草及殉難錄等子四文梁年十三母病危剖心以救母愈文梁竟卒

方元衡字莘田安徽桐城人以貢生官光祿寺署正父病失明晨夕調護廁牕必躬親之終親之身不稍怠推產給弟惟筆耕以奉甘旨年五十依母懷如嬰兒居喪不宴笑不居內日所行必告於主葬則廬墓側歲時祭必哀戚盡禮俗感於風水常停柩久不葬請設勸葬局限期督葬無後者則購地代葬之先後逾五萬具復設採訪局採訪全省節孝貞烈歷二十年彙請得旌者凡十餘萬人建總祠總坊於省會有司春秋致祭著有續心學宗孝經淺註卒後皖人上其孝義行特贈五品卿

葉成忠字澄衷浙江鎮海人世爲農六歲而孤母洪撫以長爲農家傭苦主婦苛去之上海掉扁舟江上就來舶竊雜具西人有遺革囊路側者成忠守伺而還之酬以金不授乃爲之延譽多購其物因漸有所蓄西人製物以機器凡雜具以銅鐵及他金類造者設肆以鬻謂之五金成忠肆虹口數年業大盛乃分肆徧通商諸埠就上海漢口設廠縑絲造火柴資益豐乃置祠田興義塾設醫局會朝議重學校成忠出資四十萬建澄衷學堂規制宏備生徒景從製字課

圖說修身與地諸書諸校用之以爲善本又建懷德堂備於所設肆者死育其孤恤其煢困乏者歲時存問毋俾凍餒鄉人爲之諺曰依澄衷不憂窮凡備於葉氏皆爲盡力成忠屢以出資助賑叙勞至候選道加二品頂戴卒命諸子人擇一業行義竟其志勿邀賞

楊斯盛字錦春江蘇川沙人爲坊者至上海上海既通市商於此者咸受屢焉斯盛誠信爲儕輩所重三十後稍稍有所蓄乃以廉值市荒土營室不數年地貴利倍徙善居積擇人而任各從所長設肆以取贏迭以助賑叙官光緒二十八年詔廢科舉設學校出資建廣明小學師範傳習所越三年又建浦東中小學青墩小學凡糜金十八萬有奇上海業土木者以萬計衆議立公所設義學斯盛已病力贊其成事立舉海濱潮溢居民多死者斯盛出三千金以賑又集資數萬全活甚衆浦東路政局科渡捐急民大譁官至羣毀其輿斯盛力疾往揮衆散捐亦罷又出資規築洋徑陸家渡六里橋南諸路改建殷家橋創設上海南市醫院諸事畢舉建宗祠置義田依故友族人咸有恩紀及卒遺命散所

蓄助諸不給遺子孫者僅十一

武訓山東堂邑人乞者也初無名以其第曰武七七孤貧從母乞於市得錢必市甘旨奉母母既喪稍長且傭且乞自恨不識字誓積資設義學以所得錢寄富家樞子母積三十年得田二百三十畝有奇乞如故藍縷蔽胥晝乞而夜織或勸其娶七謝之又數年設義塾柳林莊築塾費錢四千餘緒盡出所積田以資塾塾爲二級曰蒙學曰經學開塾日七先拜塾師次徧拜諸生具盛饌饗師七屏立門外俟讌罷啜其餘曰我乞者不敢與師抗禮也常往來塾中值師晝寢默跪榻前師覺驚起遇學生遊戲亦如之師生相戒勉於學有不謹者七聞之泣且勸有司旌其勤名之曰訓嘗至館陶僧了證設塾鴉莊貲不足出錢數百緡助其成復積金千餘建義塾臨清皆以其姓名名焉縣有嫠張陳氏家貧刲肉以奉姑訓予田十畝助其養遇孤寒輒假以錢終身不取亦不以告人光緒二十二年歿臨清義塾廡下年五十九病革聞諸生誦讀聲猶張目而笑縣人感其義鑄象於石歸田四十畝以其從子奉祀山東巡撫張曜袁樹勛先後

疏請旌祀孝義祠

呂聯珠字星五漢軍正黃旗人隸盛京內務府所居村曰瓦子峪貧授徒爲大父及父母養一介不妄取應鄉試徒步千餘里有富家子招與同乘堅卻之光緒十四年舉於鄉授筆帖式補催長不改其狷聯珠有從叔其一貧無子請兼祧侍養叔嚴急事之盡禮其一出遠游以廢疾歸奉於家喪葬昏嫁力任之有田招佃以耕隣田鬻於人占聯珠田五尺聯珠言於官讓與之田中有他氏墓爲之掃除歲祭焉同學坐事繫獄死爲之葬姻家有以疑獄死京師者赴會試爲携其骨還葬聯珠篤行式於鄉人治程朱之學鄉人奉其教久之卒